

ANG IKATULONG EXODO



All things are possible, only believe.

Iduko nato ang atong mga ulo karon alang sa pag-ampo. Samtang nakaduko ang atong mga ulo, aduna kaha og unsa mang espesyal nga mga paghangyo nga gusto ninyong maipahayag sa atubangan sa Dios. Ipataas lang ang kamot ug, sa ilalum lang sa inyong kamot, kupti lang ang inyong mga hangyo.

² Langitnong Amahan, mapasalamaton kami tungod niining, usa na usab ka kahigayonan nga magkatigum, sa niining bahin sa Walay-Katapusan. Ug nagapaabot kami niining buntaga alang sa pagbag-o og kusog nga magagikan Kanimo, sa paghatag kanamo og kaisug alang sa umalabot namong panaw. Nagkatigum kami sama sa ginahimo kaniadto sa Hebreohanong mga kaanakan sa sayo sa buntag, aron panguhaon ang mga manna nga gitagana na alang kanila sa tibuok gabii, aron makahatag kanila og kusog sa sunod nga tibuok adlaw. Nagakatigum kami alang sa espirituhanong Manna, niining buntaga, aron nga mahatagan kami og kusog alang sa maong panaw.

³ Ilalum nianang mga kamot nga nahipataas, nasayod Ka sa tanan nilang mga panginahanglanon, Ginoo. Ug ginapangaliya ko ang akong pag-ampo, uban kanila, sa Imong atubangan, nga Imong suplayan ang matag panginahanglanon nga ilang gikinahanglan. Ayoha ang mga masakiton ug ang mga nag-antus, Ginoo. Nahibalo kami nga Ikaw ang Dios, ug nga mabuhat ang tanang butang, ug nagsaad nga buhaton ang mga niini kung mabuhat lang namo sama sa ginaagda kanamo sa maong kalantahon, *Only Believe*, ug samtang nga madungog namo ang maong mahimayaong mga pulong, *Walk And Talk With The King*.

⁴ Karon, Amahang, Dios, panalangini ang Imong Pulong sa diha nga igapahayag Kini karong buntaga, ug hinaut nga makita Niini ang Iyahang dapit-pahulayan dinhi sa among mga kasingkasing, nga mahimong maihatud Niini ang mga butang nga gikahangyo namo, Amahan. Sa Ngalan ni Ginoong Jesus amo kini ginapangamuyo. Amen.

Makalingkod na. Salamat kanimo, igsoong babaye.

⁵ Nagatoo ako sa giingon na, “Nalipay ako sa pag-ingon nila kanako, ‘Mangadto kita sa balay sa Ginoo.’”

⁶ Sa pagbiya ko sa Hot Springs, kagahapon, nagaingon si Igsoong Moore, “Igsoong Branham,” miingon, “ikaw, dili ka ba mobiyahe, pa-Texas, ug ubanan ako sa kombensiyon” didto,” miingon, “nga makapahulay ka og pipila ka adlaw?”

7 Ingon ko, “Aduna man ko’y duha pa ka mga panerbisyo ugma.”

Miingon siya, “Duha pa ka panerbisyo?”

Ingon ko, “Oo.”

8 Miingon, “Sa ingon ka grabe mong pagpangwali dinhi,” miingon, “angay nga mopahulay ang usa ka tawo og usa ka semana pagkahuman sa matag usa niini.” Miingon pa, “Pananglitan ang usa ka pastor, pagkahatag niya sa iyang pangbuntag sa Dominggo nga mensahe, ug uban pa,” miingon, “dayon mopahulay na siya pagkatibuok semana. Ug, dayon, ug tingali traynta minutos pa kana, o mga ingon niana.” Ug miingon, “Nagwali ka dinhi mga duha o tulo ka oras, sa matag higayon,” miingon, “dayon, kada adlaw pa, ug usahay duha pa ka higayon sa usa ka adlaw, ug dayon mopahigayon pa og usa ka prayer line, tanan nianang mga pag-ila.” Miingon, “Karon moingon ka nga mopauli ka, nga magkaadunay duha pa ka mga panerbisyo sa Dominggo?”

Ingon ko, “Oo, sir.”

Miingon, “Ginaunsa mo man pagbuhat niini?”

Ingon ko, “Ang akong panabang nagagikan sa Ginoo.”
Kita n’yo?

9 Ulahi na ang panahon, sama sa giingon sa usa, adunay miingon dili pa lang dugay, diha sa pag-ampo, samtang nga pasulod ako kaganina. Ulahi na ang panahon, ug daku ang panginahanglanon, ug ania kita sa pagpaninguha paghatag sa atong bahin, sa pagtabang sa niining makuyaw nga panahon nga gikapuy-an nato.

10 Karon, kon itugot sa Ginoo, karong gabhiona, gusto kong maghisgot sa hilisgutan, “Ang imo bang kinabuhi takus ngadto sa Ebanghelyo?” Kana’y, gusto kong ipa-teyp kana.

11 Ug karon, wala ko kahibalo kung ila bang iteyp kini karong buntaga, o dili. Aduna ko’y nakita dinha sa kuwarto. Adunay—adunay pipila ka mga igsoong lalaki nato dinha; nagtoo ko nga gina-teyp nila. Nagtoo ko . . . Hunahuna ko nga buhaton kini ni Igsoong Neville. Gihangyo ko, sa miaging Dominggo, nga siya na ang magkaaduna og iyang . . . ipadayon niya ang iyang mensahe; ug dayon nga padayonon lang, mohatag lang ko og kung unsa man pagkahuman niya. Pero, kung gusto nilang iteyp ang pang-Sunday school nga leksyon, aba, okey kana.

12 Ug dayon, kon itugot sa Ginoo, sa sunod Dominggo, kana, kung ikatugot sa Ginoo ug nga ania kita dinhi, gusto kong hisgotan ang hilisgutan nga gipangandoy ko sa dugay nang panahon, ug sa gisaad na nga hisgotan ko ang maong mga Mensahe nga sama niana gikan sa tabernakulo, una, kanang ginatateyp nga mga Mensahe. Gusto kong idimanda kining

henerasyon tungod sa paglansang kang Jesus Cristo; sa sunod buntag sa Dominggo, kon itugot sa Ginoo.

¹³ Ug karon, karong gabii, sa alas siete, o alas siete y medya, mao ang—mao na ang Mensahe mahitungod sa “Ang kinabuhi mo ba takus?”

¹⁴ Karon, usahay, sa pagwali niining mga Mensahe nga sama niana, makasulti ako’g mga butang nga medyo makapasakit gayud. Ug wala ko gayud eksakto nga ginatuyo kini alang sa niining iglesia dinhi, o unsa man. Hinumdumi, pagmowali ako, nagakadangat kini sa tibuok kalibutan. Kita n’yo? Ug aduna kita’y ginapahigayon nga mga pagteyp, sa tibuok kalibutan, ug ilang ginadala kining mga Mensahe ngadto sa mga kalasangan ug sa tanan nang dapit. Ug ginapangunahan ako usahay sa Balaang Espiritu sa pagsulti og butang nga mamahimo ang mao mismong butang nga gusto Niya alang sa usa ka tawo nga didto pa sa Australia, sa usa ka lugar, o unsa man. Busa, tingali, may mga kahintang, nga moingon kamo, “Bueno, karon, wala man kana nagakahitabo nga kahintang dinhi. Alang sa unsa man niya kana ginasulti?” Alang kini tingali sa ubang lugar, nakita n’yo. Busa, oo, sigurado ako nga nakasabot kamong mga tawo niana, nga kining mga Mensahe wala napahinungod sa kung kinsa man. Napahinungod gyud Kini ngadto sa Iglesia, sa kinatibuk-an niini, sa tanang dapit, ug kung unsa pa man nga igiya sa Ginoo kanato nga isulti ug buhaton.

¹⁵ Nagkaaduna og mahimayaong panahon didto sa Hot Springs, ug didto sa usa ka kinaraang Pentecostal nga tigum. Sigurado ko nga daghan kaninyong mga Pentecostal ang natagbaw didto, sukad nga—nga mitambong kamo didto. Bueno, lamang, dili ko kaila ang maong grupo. Mga usa ka semana unta ako nga atua didto, ug nakahatag ako og duha o tulo ka adlaw. Apan usa ka butang ang masulti ko. Sa niana nga tigum, aduna gyud sila og pagtoo, nga motoo. Kung aduna man kaninyo ang atua didto. . .

¹⁶ Nga, nahibalo ako, kining gining dinhi, nga naglingkod dinha sa suuk, wala ako nakaila kung kinsa siya. O, mismo dinhi, nasayod ako nga atua siya didto. Ug nasayod ako nga aduna pa’y pipila ka mga igsoon ang atua didto, si Igsoong Jackson, sila, si Igsoong Palmer.

¹⁷ Mao kana ang maangkon sa mga tawo pag-aduna sila’y pagtoo. Kita n’yo? Nahimatikdan ba n’yo kadtong linya sa pagpaampo? Wala’y ni usa nga misulod o migawas man nga wala giayo sa Dios. Kita n’yo? Kita n’yo? Ug busa, pag-aduna ka’y pagtoo. . .

¹⁸ Ug usa pa ka butang, mahimong aduna’y pipila kaninyo, nga tingali wala nakasabot niadtong mga emosyon, mga pagsayaw-sayaw, pagsinggit-singgit. Bueno, sila gayu’y. . . Wala

sila nakalantaw sa kang kinsa man nga tawo. Nagasinggit lang sila, atubangan sa Dios. Kita n'yo? Okey kana.

¹⁹ Apan, gusto kong isulti, nga usa kadto sa—usa sa pinakalimpyo tan-awon nga pundok sa mga kababayan-an nga nakita ko sukad, kadtong tag-as nga mga buhok, ug—ug mga tawo nga gikan pa didto sa lasang, didto pa sa mga kalibunan. Apan nagtoo ko nga wala gyud ko nakakita didto kanang medyo moderno kaayo tan-awon, nahibalo na mo kung unsa'y akong pasabot, nga aduna'y tanan nang matang sa meyk-ap ug ingon nianang mga butang. Nagapakita lang kini. Mahimong wala ko miuyon sa tanan nga ilang ginapanudlo, apan siguradong uyon ako dinha. Kanang ilang pagka-Cristohanon kon tan-awon, alang kanako.

²⁰ Busa gigiyahan ako sa Ginoo nga hisgotan ang usa ka hilisgutan, kagahapon, o sa miaging adlaw, sa kaudtohon: *Usa Na Lang Ka Higayon Pa, Ginoo*. Ug didto sa iglesia, ang uban kanila didto wala nasayod, nga gibuhat ko kadto alang sa usa ka katuyoan, tungod kay gigiyahan ako sa Ginoo nga buhaton kadto. Nagakapalid na niadto ang kadtong gamay'ng pundok ngadto sa kung unsang butang, ug mitabang ang Dios alang niana sa—sa pagbuhat niini. Busa, pagkamaanindot kadto. Sigurado kong. . .

²¹ Kahibalo na mo, nagakahitabo ang mga butang. Kung wala ka'y espirituhanong mata, dili mo makuha kini. Kita n'yo? Kinahanglan mong bantayan kining mga butanga.

²² Misulod ako. Ug kining si Igsoong Ungren, mga ikaduhang higayon ko na gayud kadto nga madungog ang maong tawo nga nagakanta. Pagsulod ko mismo sa maong lawak, ginakanta niya ang *I Walk And I Talk With The King*. Hunahuna ko, “Dili ba pagkatahum kana!” Kung unsa nga ang Hari gayud. . . Kita n'yo? Nagalakaw ug nga nagapakig-estorya, ang pasabot niana usa kini ka walay puas nga pagpakigkauban. Dili lang diha sa iglesia, kondili, bisan asa man, nagalakaw ug nga nagapakig-estorya sa Hari.

²³ Ug didto, paghangad ko sa maong bongbong, ug didto ang usa ka kard nga nakapilit sa usa ka gamay'ng larawan didto, nga medyo usa ka talan-awon nga gidrowing sa usa ka lalaki nga ginganla'g George Todd nga—nga alang kanako. Wala ko kahibalo kon ngano gayud nga gibuhat kini sa maong tawo. Tingali, mahimong, wala lang niya nahunahunaan kini, ug nga iya lang gidrowing kini. Usa kini ka larawan sa usa ka bukid, didto sa kalasangan, ug—ug nga may nagadagayday nga sapa. Ug sa pikas sa maong sapa, nagtindog ang usa ka inahan nga usa ug nating usa, nga nakatindog ang mga dalunggan niini, nagalantaw ngadto sa pikas nga bahin sa sapa. Wala ko kahibalo kung ania ba kaha si Mr. Todd. Wala ko nakaila kaniya. Apan, gusto kong isulti kini, nga nagsulti ang Dios kanako sa pagkakita

ko niadto nga larawan. Ug tingali nga wala siya nahibalo, sa diha nga gina-drowning niya kini niadto.

²⁴ Nahihumduman n'yo ba ang hamubo kong estorya bahin sa usa nga pagapusilon na niadto sa akong kauban, ug ang iya pang pamito? Bueno, atua kini didto ug ang anak niini, sa mao gayud, tupad didto sa tubig sa kinabuhi. Kita n'yo? Pagdihog kini, kung unsa nga ang maong inahang usa ug ang anak niini anaa dinha! Ug nahunahunaan ko, "Oo. Ug didto sa halayong dapit, aduna didto, sa niadtong mga kanunay lunhaw'ng kahoy, atua ang akong—atua didtong dapita ang akong asawa ug anak, usab, nga nagapaabot didto."

²⁵ Salamat kanimo, igsoon, Igsoong George Todd, kung ania man ang maong lalaki dinhi karong buntaga.

²⁶ Karon, hisgotan ko na ang maong pang-Sunday school nga leksyon. Kasagaran daw sa madugayan ako niini.

²⁷ Adunay usa ka butang nga padayon nagapanglihok sa akong kasingkasing. Wala ko kahibalo, sukad pa kagahapon. Karon atong . . . kung ang Ginoo . . . maoy usa—usa ka hilisgutan. Nagakatigulang na ako, ug ako—wala ko kahibalo kung unsa pa ang akong kadugayon nga magpabilin dinhi. Apan adunay usa ka dakung pangutana sa iglesia, nga nagpalinahiay sa mga tawo, ug nagpaaduna og nagkalain-laing ideya.

²⁸ Sama lang gayud sa pagkaon "sa mansanas." Ug nagwali na ako bahin sa maong Mensahe, ug nagatoo ako, sa hugot, mahimong pamatud-an kini pinaagi sa mga Kasulatan, nga dili kadto mga mansanas. Kita n'yo? Nakapalibug gayud kini'g daku.

²⁹ Busa, tingali, sa dili pa kami mobiya . . . Gikinahanglan namong mobalik karon, sulod sa mga traynta ka adlaw, kahibalo na mo, pabalik sa Arizona. Ug busa nga, sa dili pa ako mobiya, kon itugot sa Ginoo, gusto kong hisgotan ang maong Kasulatan. Ug ayaw iteyp kini. Kung iteyp man nila, ayaw ibaligya ang maong teyp. Ayaw ipagawas kini. Gusto kong isaysay ang Kamatuoran gayud bahin sa kasal ug panagbulag. Usa ka pangutana kini. Ug kini ang ulahi nang mga takna, nga, "Sa dihang ang tanan nga mga tinago sa Dios matapos na." Ug kagahapon, sa paanhi na ako patabok sa mga kabukiran, mga banagbanag na, daw sa nagasulti niadto kanako ang Balaang Espiritu, "Iteyp kana ug itagana kini," wala ko kahibalo kon ngano, apan, "ang Kamatuoran gayud bahin sa kasal ug panagbulag."

³⁰ Nagaingon ang uban kanila, "Mahimong ikasal ang mga tawo, kung makapanumpa sila nga nakapanapaw sila kaniadto." Ug nagaingon ang uban, "Bueno, kung wala man nila ginatratar og maayo ang usa'g usa, ug—ug nga dili mahimong magpuyo na nga magkauban; mas maayong magkinabuhi, sa yuta, nga malinawon, kay sa magkinabuhi nga impyerno ibabaw sa yuta."

Ug tanan na nianang nagkalainlaing mga pangutana! Ug ang uban mokasal kanila sa unsa na lang nga kinaraang paagi. Ug ang uban gustong wisikan sila sa balaan nga tubig, ug gipabalik sila, ug moingon, “Wala pa man gyud sila sukad nakasal.” Ug panalanginan sila, ug itugyan sila ngadto sa iglesia pag-usab. Dinha ang tanan nang matang sa kalibog. Apan, kung aduna ma’y ingon niana ka dakung kalibog, aduna gyu’y Kamatuoran kon asa man.

³¹ Nagatoo ako, ug ginasulti kini nga may pagtahud, nagatoo ako nga gipadayag na kini sa Ginoo kanako, ug akong... ang Kamatuoran. Ug kung mokaylap kini sa mga kaiglesiahan, magkapikas-pikas kini. Nga, tingali ngay lang nga mahitabo sa niini. Apan kini... Mas gustohon ko nga ang mga pastor na, tugotan na lang ang mga pastor sa mga kasimbahanan, ang makakuha sa maong teyp. Ug paminawan nila kini, ug dayon sila na ang manggiya sugod dinha. Apan gusto ko gayud nga iteyp kana, aron ipakita gayud ang Kamatuoran bahin niini. Nagatoo ako nga kini na ang takna kon kanus-a nga kining mga “tinago mamatapos na,” mahuman na. Naagian na ang mga niini, sa nangahisgotan na nato, ang tibuok mga kapanahonan, diha sa mga teyp, sa gihisgotan nato ang kadtong *Mga Pito Ka Selyo*, ug *Ang Pito Ka Kapanahonan sa Iglesia*.

³² Ug nagaatubang kita karon sa panahon sa *Pito Ka Mga Trumpeta*, ug dayon ang *Mga Panaksan*. Ug tingali makapahigayon kita og pang-duha ka semana nga panagtigum ug usahon na nato ang mga niini. Gusto kong maiteyp kini.

³³ Ug dayon, wala’y labot niana, ginapaninguhaan ko karon nga maipa-proofread kini, ug himoon kini nga mga libro, bahin sa *Mga Pito Ka Kapanahonan*; pito ka libro bahin sa maong kapanahonan sa iglesia, pito ka mga teyp, ug himoon kining mga ingon niana. Mahimo natong ipahigayon kini sa ingon ka barato nga mahimo nato, aron nga ang tanan makaangkon niini. Dayon, kung magdugay pa ang Ginoo, ug padayon pa ako, makita ninyo nga ang mga gisulti kong mga butang sa Ngalan sa Ginoo magakahitabo gayud sumala sa pagkasulti Niini. Wala gayud pagkapakyas, hangtud karon, ug ang uban Niini magakahitabo gayud sa umalabot.

³⁴ Ug ako—nagasalig ako nga pagatugotan kita sa Ginoo nga himoon kana dayon. Ipahibalo namo sa mga tawo, usa ka higayon, tungod kay daghan ang gustong motambong ug maminaw sa nianang mga butanga. Ug ako—ug ginahatagan ko kana’g bili.

³⁵ Kung wala’y mitoo Niini, o mipatalinghug Niini, unsa mang kaayohan ang mahatag niini kanako, ang pagtindog dinhi, nga mosulti og unsa man bahin Niini? Kita n’yo? Mamahimong sama lang nga ginalabay ko ang tinapay sa mga tubig. Mamahimong sama kini sa... Kung wala man ni usa nga motoo niini, nan

mahisama kini sa paglabay og mga mutya ngadto sa mga baboy. Apan aduna ma'y linibo ka linibo ang nagatoo Niana. Kita n'yo? Ug nanaghawid sila sa matag Pulong. Ug gusto natong makapasulod pa og daghan, sa kutob natong mahimo, sa diha nga atong—sa diha nga andam na natong ipahigayon kini nga mga panerbisyo, ug alang sa kahimayaan sa Ginoo. Ug nagasalig kita nga igahatag kini kanato sa Dios.

³⁶ Ug dili ko gustong buhaton kana hangtud nga Langitnong madihogan na ako sa pagbuhat niini. Adunay panahon ang Dios alang sa tanang butang. Kita n'yo? Ayaw gayud unahi kini. Paggalabon mo na ang imong trigo sa dili pa . . . Magbutang na sila og makina'ng ig-aani didto sa dili pa nga gulang kini, mawala kanimo ang mas daku nga bahin sa imong trigo. Kita n'yo? Busa, sa diha nga andam na igalab ang galab, galabon na kini sa Dios, dayon mangadto na kita sa pag-ani. Apan ako lang . . .

³⁷ Sa diha nga, may kabug-aton ako nga sama niana. Hunahuna ko nga makalingkawas ako niini, pagkataudtaud. Tibuok adlaw kagahapon, dili ko matangtang kini sa akong hunahuna, sa tibuok gabii kagabii. Mihigda na ako sa mga alas dose. Mga tulo lang ka oras ang akong tulog, sa miaging gabii. Ug dili ako makatulog kagabii. Sa gihapon, Adunay miingon, “Iteyp kana, *Ang Kasal Ug Panagbulag*.” Kita n'yo? Busa ako—akong . . . Kon itugot sa Ginoo, kung mopadayon kana sa akong kasingkasing ug mopakita ang Ginoo kanako og dugang pa bahin niini, bueno, kung ingon-ana, akong . . . Ako—ako tingaling iteyp kana. Kita n'yo?

³⁸ Apan, hinumdumi, alang lang sa mga ministro. Tambong mo, apan, ug maminaw mo. Apan ang maong teyp mismo, toguting . . . Kita n'yo, kay pag-mokaylap kini sa mga kongregasyon, ug ang uban paingon *niining* pagsabot, ug ang uban paingon *niana*, ug mohimo na sa kinaugalingon nilang panghunahuna. Ug gusto kong magkaaduna niini ang mga igsoon natong ministro diha sa ilang tun-ananan, ug bahala na sila dayon mosugod dinha, tungod kay sila man niini ang manubag. Sila gayud. Gusto kong moadto didto ug ipadungog kini ngadto sa maghuhukom, sa pipila niining mga mahistrado. Oo.

³⁹ Tan-awa kung unsa ang giingon sa Ginoo bahin sa niining, *Kasal Ug Panagbulag*. Mas sagrado kini kay sa ginahunahuna sa mga tawo bahin niini. Ug motakdo kini mismo sa *Ang Binhi Sa Serpente*. Pareho lang nga butang, nga nagapadayon hangtud karon, kana sila nga mga tinago. Hinumdumi, “Sa mga adlaw sa ikapitong manolunda, ang tanan nga mga tinago sa Dios matapos na,” ang kadtong wala nahibaloan nga mga butang pagatapuson na sa Ginoo. Karon, kutob sa . . .

⁴⁰ Karon timan-i, alas siete y medya ang maong oras nga sugdan n'yo ang inyong panagtigum. [Nagaingon si Igsoong

Neville, “Oo.”—Ed.] Karon, Igsoong Neville, kung aduna ka’y mensahe alang unyang gabii, iwali kini. Kita n’yo? [“Wala, sir.”] Dili man ko mosobra niini og mga usa ka oras o kuwarentay singko minutos, ug igateyp ko ang uban pa niini.

⁴¹ Gusto kong maminaw kang Igsoong Neville. Gimahal ko siya. Ako siyang igsoon. Ug ako—nagtoo ko nga usa siya ka maayo kaayong mamumulong, makahibulong nga ministro. Ug akong. . . Ang usa ka butang bahin kang Igsoong Neville, nga gusto ko, sa dihang mosulti siya og unsa man, gikinabuhi niya kung unsa gayud ang iyang ginasulti. Karon, kana—mao kana ang pinakamahinungdanong butang.

⁴² Kahibalo mo, mas maayo pang ikinabuhi mo atubangan sa usa ka tawo ang ginawali mo kay sa walihan mo siya og usa. “Kay kamo mismo ang mga sulat nga nasulat, nga ginabasa sa tanang tawo.” Karon, atong, sa dili pa kita. . .

⁴³ Mahimo natong ablihan ang mga panid, apan gikinahanglan ang Dios ang mag-abli niining pang-Sunday school nga leksyon, busa ato lang Siya hangyoon nga buhaton kana.

⁴⁴ Langitnong Amahan, kami—kami pinaagi sa pagtoo nagalantaw sa umalabot. Nagalantaw ako karon, pinaagi sa pagtoo, ngadto sa kung unsang butang nga umalabot, Ginoo, ibabaw sa yuta, nga maoy magapahiusa sa Imong mga katawhan. Sa diha nga makita namo nga ang maki-denominasyong mga kaiglesiahian nagapangpiit na ug nagakalahi na gyud, nga ginatukmod na niini ang mga tawo pagawas; sama gayud sa nahitabo kaniadto sa Egipto, nga mitungha ang usa ka faraon, nga wala nakaila kang Joseph.

⁴⁵ Maingon kaniadto sa Germany, ug—ug didto sa Rusya, ug Italya, nanungha gikan sa maong mga tawo ang mga Joseph, Hitler ug Stalin, Mussolini, nga gidumtan ang mga Judio. Gikinahanglan na nilang mobalik sa ilang yutang pinuy-anan. Dios, aduna Ka’y mga pamaagi sa pagbuhat og mga butang, nga dili namo masabtan. Ug gipiit Mo sila. Wala na sila’y mga puy-anan sa Germany; gipang-ilog na ang tanan-tanan gikan kanila. Didto usab, sa Italya, sa Rusya, wala na’y lugar nga maadtoan. Ug gipabalik sila ngadto sa ilang yutang pinuy-anan, aron lang nga matuman ang Pulong.

⁴⁶ Oh, ang mahigugmaon gyud nga kamot sa Dios! Kung unsa, nga usahay, walay-kaluoy kini kon tan-awon, kung unsa ang pag-antus sa niadtong mga tawo, apan kadto, sa gihapon, ang maloloy-ong kamot ni Jehovah, nga nagagiya sa Iyang luoy’ng mga anak. Ginapasalamat na Ka namo, Ginoo.

⁴⁷ Karon nagaampo ako, Dios, sa diha nga makita ko ang panahon. Nga, ginapangpiit na sa denominasyon ang mga magtotoo, ginapang-ekskomunikar sila, nagaingon, nga, “Kinahanglan ang ilang ngalan malista gayud diha sa ilang libro, o kung dili malaglag sila. Nga dili na gayud

makighilambigit sa ubang grupo.” Ang maloloy-ong kamot lamang kini ni Jehovah, nga nagagiya kanila ngadto sa Kahoy sa Kinabuhi. Ginaampo ko, Dios, kana, ang matag-usa. Nasayod akong mamaingon gayud sila. Tungod kay, Pulong Mo kini, ug dili kini mapakyas. Ug hinaut nga magiyahan kami ngadto sa maong Kahoy sa Kinabuhi, nga mamahimo kaming tigpanagiya sa Kinabuhing Walay Katapusan, makita ang kamot sa Dios, ug, nga pinaagi sa mga mata sa pagtoo, malantaw namo ang luyo niining mga landong nga among ginalakwan karon, makita nga anaa lang sa unahan ang Yutang saad.

⁴⁸ Panalangini ang Imong Pulong, karong buntaga, Ginoo, kining pipila ka mga Kasulatan ug ang mga lista nga ako nang napangsulat dinhi. Hinaut nga ang Balaang Espiritu moanhi karon, samtang nga ginahalad ko ang akong kaugalingon, ang pagcircuncida sa dila ug panghunahuna, sa hunahuna. Ug nga ginahalad usab sa iglesia ang ilang mga igdulogog sa pagpanabot, ang ilang mga kasingkasing, ug tanan kami, sa dungan, nga magapakigsulti Ka kanamo pinaagi sa Imong Pulong, kay ang Imong Pulong Kamatuoran. Sa Ngalan sa maong Pulong, si Jesus Cristo, among ginapangamuyo kini. Amen.

⁴⁹ Karon, ablihi ang inyong mga Biblia, ngadto sa Basahon sa Exodo. Ug karon gusto kong mobasa og usa ka bahin diha sa Kasulatan gikan sa Exodo, sa ika-3 nga kapitulo, gikan sa 1 ngadto 12. Paminawi gayud, og maayo, samtang ginabasa nato. Exodo, sa ika-3 nga kapitulo, 1 ngadto sa 12.

Karon si Moises nagbantay sa mga panon sa mga carnero ni Jetro nga iyang ugangan, ang sacerdote sa Midian: ug siya nagdala sa panon sa mga carnero sa likod sa kamingawan, ug miadto sa Horeb, nga bukid sa Dios.

Ug nagpakita kaniya ang manolunda sa GINOO sa usa ka siga sa kalayo sa taliwala sa usa ka sapinit: ug ang . . . siya . . . ug siya mitan-aw, ug, ania karon, ang sapinit misiga sa kalayo, ug ang sapinit wala maugdaw.

Ug miingon si Moises, moadto ako karon ug tan-awon ko kining dakung talan-awon, nga ang sapinit . . . kung unsa nga ang sapinit wala masunog.

Ug sa nakita sa GINOO nga miadto siya sa pagtan-aw, . . .

⁵⁰ Gusto kong mohatag og pagpatataw pa dinha!

Ug sa nakita sa GINOO nga miadto siya sa pagtan-aw, ang Dios mitawag ngadto kaniya sa taliwala sa sapinit, ug miingon, Moises, Moises. Ug siya mitubag, Ania ako.

Ug miingon siya, Dili ka magduol dinhi: apan huboa ang imong mga sandalias gikan sa imong mga tiil, kay ang dapit nga imong gitindogan yuta nga balaan.

Labut pa miingon, Ako mao ang Dios sa imong amahan, ang Dios ni Abraham, ang Dios ni Isaac, ug ang Dios ni Jacob. Unya si Moises mitabon sa iyang nawong; kay siya nahadlok sa pagtan-aw sa Dios.

Ug ang GINOO miingon, nakita ko pag-ayo ang kaguol sa akong katawohan nga atua sa Egipto, . . . hingduangan ko ang ilang pagtuaw tungod sa ilang tinugyanan; kay naila ko ang ilang kalisdanan;

Ug nanaug ako sa pagluwas kanila sa mga kamot sa Egiptohanon, ug sa pagkuha kanila gikan niadtong yutaa ngadto sa usa ka yuta nga maayo . . . usa ka yuta nga halapad, ug usa ka yuta nga nagapaagay sa gatas ug dugos; sa mga dapit sa Canaanhon, . . . Hetehanon, . . . Hebehanon, . . . Jebusehanon.

Ug karon, tan-awa, ang pagtuaw sa mga anak sa Israel nagaabot sa akong atubangan: ug nakita ko usab ang paglupig nga ginalupig kanila sa mga Egiptohanon.

Busa umari ka karon, ug pagasugoon ko ikaw ngadto kang Faraon, . . .

- 51 Nahimatikdan ba ninyo? “Nanaug Ako.” Apan, “Ginasugo Ko ikaw.” Ang Dios, nga nagapamuhat diha sa porma sa tawo. “Lakaw ka.” Tugoti kong basahon ang ika-10 nga bersekulo pag-usab.

Busa umari ka karon, ug pagasugoon ko ikaw ngadto kang Faraon, aron kuhaon mo ang akong katawohan nga mga anak sa Israel gikan sa Egipto.

Unya si Moises mitubag sa Dios, Kinsa ba ako, aron ako moadto kang Faraon, ug magakuha gikan sa Egipto sa mga anak sa Israel?

Ug siya miingon, Sa pagkamatuod ako magauban kanimo; ug kini mao ang timaan alang kanimo, nga ikaw akong gisugo: Unya ugaling nga moadto ka na . . .

- 52 Pasayloa ako dinha.

. . . Unya ugaling sa makuha mo na kining katawohan gikan sa Egipto, magaalagad kamo sa Dios sa ibabaw niining bukira.

- 53 Wala ko kini nahimatikdan, sa una, apan tungod sa pagbati sa halawum gayud nga pagdihog sa Espiritu karong buntaga, mao pa’y pagkakuha ko niana. Ang Dios, nga ginasugo ang Iyang alagad pabalik didto kon diin nga gikalagiwhan niya kaniadto, Iya siyang gihatagan og usa ka ilhanan nga usa ka bukid. Wala ko gayud nahimatikdan kini hangtud kaganina lang. “Kini

ang mamahimong Walay Katapusan nga timaan alang kanimo.” Kita n’yo?

⁵⁴ Karon magahisgot kita, karong buntaga, diha sa hilisgutan mahitungod sa ikaduhang exodo karon; mahitungod sa katawhan sa Dios, o ang pagtawag sa katawhan sa Dios pagawas. Ang *exodo* nagakahulogan og “gipahigawas; gitawag pagawas; gikuha pahalayo gikan sa.” Ug gusto kong gamiton kana ingon nga usa ka hilisgutan, mahitungod sa ikaduhang exodo sa katawhan sa Dios. [Gi-ulohan kini ni Igsoong Branham nga, *Ang Ikatulong Exodo*, diha sa pang-gabii na nga panerbisyo—Ed.]

⁵⁵ Karon, nagkaaduna na sila niadto og daghang mga pag-exodo, siyempre, apan ang akong ginahisgotan maoy mahitungod niadtong higayon nga nagtawag ang Dios og usa ka exodo, usa ka pagpahalayo gikan sa kung asa sila dapit niadto, sa ilang panahon kaniadto. Dinhi, nagapangandam na ang Dios sa pagtuman sa Iyang Balaanong Pulong nga gikasaad Niya kaniadto kang Abraham, ug kang Isaac, ug kang Jacob. Sa mga katuigan na, sa milabay na ang ginatus ka mga katuigan, apan, sa gihapon, wala gayud nakalimot ang Dios sa Iyang saad. Sa maong panahon, sa gikatakadang oras, kanunay’ng gipanghimatud-an sa Dios ang Iyang saad.

⁵⁶ Busa, makapaniguro gyud ka nga kung unsa man ang gisaad sa Dios diha niining Biblia, Iyang pagatumanon kini. Dili mo na kinahanglan maghunahuna og unsa pa man, ug moingon, “Bueno, ang propeta kaniadto, tingali, nasayup lang,” o, “dili kana mahimong mahitabo sa karong panahon.” Daw halos sa imposible kaniadto, mas imposible na gayud kini sa karon. Apan gituman kini sa Dios, bisan pa man, tungod kay nagsaad Siyang buhaton Niya kini.

⁵⁷ Ug tan-awa kung unsa ka yano nga ginabuhat Niya kini. “Nanaug Ako. Hingdunggan Ko ang maong pagtuaw. Nahinumduman Ko ang Akong saad. Nanaug Ako aron tumanon kini. Ginasugo Ko ikaw. Buhaton mo kini. Magauban Ako kanimo. Sa pagkamatuod, Ako magauban kanimo. Ang Akong walay-, walay-pagkapakyas nga Presensiya magauban kanimo bisan asa ka man moadto. Ayaw kahadlok.” Kita n’yo? “Nagapanaug Ako aron sa pagluwas.” Sigurado akong makuha kana sa espirituhanong hunahuna. Kita n’yo? Kita n’yo? “Ako—Akong—Ipadala Ko ikaw, aron dalhon ang Akong katawhan diha sa usa ka exodo. Tawagon mo sila pagawas, ug Ako magauban kanimo.”

⁵⁸ Karon, daw sa unsa—daw sa unsa nga makasalig gyud kita, daw sa unsa nga makakapyot gyud ang pagtoo dinha niana. Kita n’yo? Pagatumanon kini sa Dios. Iya nang gisaad kini. Bisan kung unsa pa man, kung unsa pa ang kahimtang, o kung unsa ang ginaingon ni kinsa man, pagatumanon kini sa

Dios, bisan unsaon pa, tungod kay gisaad na Niyang buhaton. Ug ginabuhat Niya kini sa pagkayano, nga, kini—nagalagpas kini sa—sa panabut sa mga nakakat-on nga panghunahuna nga maninguhang mangatarungan bahin niini, “Unsaon man pagkahimo niini?”

⁵⁹ Wala ko ginapasabot nga ang usa ka lalaki karon, nga adunay maayo, mahait nga panghunahuna, maayong edukasyon, nga kana nga lalaki dili makasabot Niini. Okey lang kana, ug maanindot man, basta nga wala niya kana gigamit aron magpangatarungan, kondili, kanang nakat-onan niya, motoo sa Dios. Tugoting mabalhin kini ngadto sa kayano sa pagpaminaw sa kung unsay giingon sa Dios, ug nga toohan Kini. Pagatabangan siya sa iyang nakat-onan kung ingon-ana.

⁶⁰ Himatikdi. Apan sa dihang sulayan na sa tawo ang pagpangatarungan, “Dili mahimo nga mahitabo kini,” nan kana ang nagapahilayo kaniya sa Dios, kanunay, sa tanang higayon, sa dihang ginasulayan niya ang—ang pagpaminaw sa kung unsa, sa kaugalingon niyang pagsabot. Kita n’yo? Kung wala ka makasabot, ug adunay ginaingon ang Dios nga usa ka butang, puntohi lang Kini og, “Amen.” Pasagdi lang kini nga sama niana.

⁶¹ Karon, imbis nga moabli kita niining mga Kasulatan, mahimo ninyong isulat kini, sa niining pang-Sunday school nga leksyon. Apan buhaton ko, tingali, kung gusto ninyong tan-awon kini. Pero, una, aduna ko’y daghan dinhi. Atong. . .

⁶² Sa dili pa nato mahimong hibaloong kung unsa ang kahulogan niining exodo, gusto kong itipo ang exodo karon; ang exodo kaniadto, sa exodo sa karon, ug bantayi kung dili ba kini eksaktong nagakaanggid. Ang usa sa mga niini maoy sa natural. Ug ang mismong mga butang nga Iyang gibuhat diha sa natural, Iyang ginatipo kini pag-usab, ginaante-tipo kini diha sa espirituhanon, nga usa ka espirituhanong exodo.

⁶³ Makahibulongan, nga masabtan ang Pulong sa Dios! Unsaon pagsulti ni kinsa man nga dili Kini dinihogan? Mga baynente-otso ka gatus na ka tuig kini ang milabay, kahibalo na mo. Ug kung unsa nga nagsaad Siya, ug kung unsa nga Iyang gihimo ug gibuklad kini dinha ingon nga panag-ingnan, kung unsa nga Iyang—Iyang—ginapakita Niya ang landong sa usa ka butang aron panghimatud-an ang—ang positibo. Pagahisgotan ko kana, unyang gabii, ang tali sa bulan ug sa adlaw, kon itugot sa Ginoo.

⁶⁴ Pero, una, atong balikan ang Genesis aron makita kon nganong atua sila sa Egipto. Nganong nahiadto man niadtong yutaa ang katawhan sa Dios? Bisan pa, nga gisaad na kadto sa Dios, didto mismo sa kinasugdanan pa, kang Abraham, Isaac ug Jacob, nga didto sila sa Palestina. Gihatag sa Dios kanila kana nga yuta, ug miingon, “Mao na kini.” Oh, kung ingon-ana, ngano

man nga wala maatua ang maong mga katawhan sa maong lugar nga gikatagana na sa Dios kanila?

⁶⁵ Mao kana ang pangutana sa karong panahon, usab. Gihatag na sa Dios kanato ang pentecostes. Gihatag na kanato ang Basahon sa Mga Buhat. Gihatag na Niya kanato ang Balaang Espiritu, aron sa pagpanguna kanato ug paggiya kanato. Gihatag Niya kanato ang usa ka Yuta. Ug nganong anaa man kita sa gawas Niini? Nganong ang iglesia anaa man sa gawas Niini? Ngano man nga ang halangdong Cristohanong iglesia sa karon wala nagakinabuhi pag-usab sama sa anaa sa Basahon sa Mga Buhat, nga ginapakita ang mao rang butang? Adunay pipila ka hinungdan nga nagkaingon-ani kini.

⁶⁶ Nasayod kitang tanan nga nagkawatas-watas na kita, ug ania kita sa usa ka makalilisang nga kahimtang. Ug ang pinakamakalilisang nga kahimtang sukad nga—nga gikinabuhian sa Cristianismo, maoy sa karon. Ug ania kita sa . . . anaa na mismo sa ngilit o nag-ungaw ngadto sa—sa usa ka daku'g, makalilisang nga paghukom nga nagahulat sa iglesia. Ug sa dili pa mahitabo kini nga paghukom, nagapanawag ang Dios og usa ka exodo, sama gayud sa Iyang gibuhat kaniadto. Ang kasal-anan sa mga Amorehanon nagkatipun-og na, busa Siya—nagapanawag Siya alang sa usa—usa ka espirituhanong exodo. Karon mobalik lang kita sa kadali, sa pagtipo, ug hibaloan.

⁶⁷ Nakaadto sila sa Egipto, tungod lang sa pagkasina sa usa ka igsoon. Mao kana ang hinungdan nga nahiadto sa Egipto ang Israel niadtong panahona, nga nahigawas niadtong ilang kayutaan. Hinumdumi, ang mga saad sa Dios maoy samtang nga nagpabilin lang sila niadtong yutaa.

⁶⁸ Karon makita n'yo na ba kung unsa ang atong ginasulti diha sa pag-ampo, kaganina lang? Ngano man nga gikinahanglan sa Dios nga pagahion ang kasingkasing ni Faraon? Aron nga mapahibalik ang maong mga katawhan sa yutang gisaad, sa dili pa Niya sila mahimong panalanginan, aron nga mahipadala na ngadto kanila ang Mesiyas.

⁶⁹ Kung giunsa nga gikinahanglan Niyang pagahion ang kasingkasing ni Hitler, nga magmahimong batok sa mga Judio, sa diha nga mestiso Judio man kini, mismo? Giunsa man nga gikinahanglan Niyang buhaton usab kana kang Stalin, kang Mussolini? Kita n'yo? Mga tawong dili dinihogan, sama sa usa ka nasud, sila—sila'y . . . Gikinahanglan sa Dios nga panguhaon ang—ang mga butang nga ilang gikinabuhian, ang mga balaod diha sa nasud, sa makadaghang higayon, aron nga mahituman ang Iyang mga saad. Busa, gikinahanglan Niyang pagahion ang mga kasingkasing niadtong mga diktador, aron pakalagiwhon ang mga Judio pabalik sa yutang saad. Gikinahanglan mamaingon niana gayud kini.

⁷⁰ Karon makita nato, nga, sa pagkahiadto nila didto, si Joseph... Nahibalo na kita sa maong estorya, sa dihang ginabalikan nato sa Genesis, ug mahimo n'yong basahon lang kini. Tungod kay, medyo naulahi na gayud ako aron sugdan kining hataas nga pang-Sunday school nga leksyon, ug panginguhaon kong dalion.

⁷¹ Himatikdi karon. Basaha n'yo ang maong estorya pagmakahigayon na kamo, ang mahitungod kang Joseph, ingon nga mas naulahing natawo kay sa iyang mga igsoon, sunod sa pinakamanghod. Masabtan kana mismo karon sa espirituhanong hunahuna. Dili siya ang pinakamanghod; si Benjamin kadto. Pero, diha sa pag-ekskomunikar, himatikdi. Bug-os nga mag-igsoon si Joseph ug si Benjamin, ug silang duha lang sa ila ang mag-igsoon. Wala sukad naangkon ni Benjamin ang pag-ila hangtud nga natagbo niya si Joseph. Ug labaw kanilang tanan, gihatag kang Benjamin ang duruha ka bahin sa tanan-tanan nga gipanghatag ni Joseph. Bueno. Himatikdi karon, makita nato nga didto, sila'y...

⁷² Napahilayo siya gikan sa iyang mga igsoon tungod kay espirituhanon siya niadto. Usa siya ka halangdon nga tawo, bisan pa nga pinakamapainubsanon sa maong pundok, pinakakabus sa maong pundok. "Ug nanagdumot sila kaniya sa walay hinungdan." Dili unta nila siya angay'ng dumtan. Gitahod nila unta siya. Tungod, ngano man nga nanagdumot sila kaniya, tungod ba kay usa siya ka igsoon? Dili eksaktong ingon-ana. Nanagdumot sila kaniya tungod kay nagapakigtigayon ang Dios kaniya nga labaw pa kaysa pagpakigtigayon Niya sa tanang uban pa kanila. Kita n'yo? Iya siyang gihatagan og usa—usa—usa ka espirituhanong salabutan. Mahimo niya ang paghubad og mga damgo, sa eksakto gayud. Ug mahimo niyang isulti daan ang mga magakahitabo pa lang nga mga butang, sa hingpit gayud, sa ingon ka eksakto kung unsa ang mga niini. Ug siya—ug wala siya nagpugong-pugong pagsulti.

⁷³ Nakita niya ang—ang damgo bahin niadtong mga binugkos nga mingyukbo atubangan sa iyang binugkos, ug nga nangasuko kaniya ang iyang mga igsoon. Miingon, "Siguro, kung ingon-ana, diha sa imo ingon nga gamay'ng holy roller," sa lain pang pinulongan, "kinahanglan namong mangyukbo sa imong atubangan sa umalabot nga adlaw?" Apan ingon niana gayud ang nahitabo. Kita n'yo? Unsaon man pagyukbo niadtong dagkung mga higante sa atubangan niadtong gamay'ng, kabus nga lalaking nagtindog didto? Apan mingyukbo gyud sila, nabuhat gyud nila, ug nagpakilooy pa. Apan wala pa siya niadto sa kagamhanan, nakita n'yo. Sa porma pa lang siya niadto sa pagkabata.

⁷⁴ Ug dayon makita nato, sa pagbuhat niya niini, nga napahilayo si Joseph sa iyang mga kaigsoonan, ang mga denominasyon, ug nag-inusara na lang siya, Kita n'yo? Ang

mga kaigsoonan niya, atua tanan sa maong yuta. Ug dayon miabot ang usa ka dakung butang. Nahibaloan nato nga ang Israel . . . samtang nga nagpuyo sila sa ilang dapit nga puy-anan, ug nagpabilin lang. Karon, usa kana ka maayong butang, ang magpabilin sa maong lugar. Sa pagkapuwesto, husto kana. Pero, gipahawa nila ang Espiritu.

⁷⁵ Ang mga pundamental, sa karon, nahibalo sila sa ilang puwesto kung unsa sila, pinaagi sa intelektuwal nga pagsabot sa Biblia, apan wala’y Espiritu. Gisalikway nila si Joseph, gipahawa nila Siya. Ayaw nilang magkaaduna og unsa man nga kahilambigitan Niini. “Usa lang kini ka pundok sa mga holy-roller. Usa kini ka . . . Dili nato gustong adunay kahilambigitan Niini.” Ila Siyang giekskomunikar, gibaligya Siya, ngadto sa kalibutan. Nawala na sila sa ilang pagpakig-fellowship.

⁷⁶ Karon, tungod sa paghimo niana, nawala na sila sa ilang puwesto, nadala na didto sa Egipto, wala magdugay.

⁷⁷ Karon, ang estorya bahin niining masinahong mga igsoon siguradong may dakung pagkapareho sa espirituhanong bahin niini sa karon. Kita—nasayod kitang tanan bahin niana, nga dalisay nga kasina kadto, dili nga dalisay. Ang sa una pa kini, nga mahugaw, mangil-ad nga kasina. Kita n’yo? Wala’y pagkadalisay diha sa kasina. Kita n’yo? Kini wala na’y lain pa kondili mangil-ad nga kasina. Sa dihang, makita nila ang mao rang Biblia, ug ang kinaiyahan sa mao rang Dios nga nagsulat sa maong Biblia, nga nagapanghimatuud sa Iyang Kaugalingon, ug dayon isalikway Kana sa wala’y hinungdan. Dalisay . . . Bueno, dili diay dalisay. Sama sa giingon ko na, mahugaw nga kasina kini. Makita ang Dios nga nagapang-ayo sa mga masakiton, nagabanhaw sa mga patay, ang mao rang Dios nga nabuhi niadtong mga panahon sa mga apostol! Ang mao rang Maayong Balita nga gisulat nila, alang niining espirituhanon nga panaw, mao ang mao lang sa gihapon nga Dios nga nagapamuhat sa mao rang mga butanga. Busa wala na’y lain pa ang mga niini kondili ang kasina, nga mao ang nagpa-ekskomunikar, “Ug dili kami magkaaduna Niini taliwala sa among mga tawo.” Kita n’yo? Ginapahawa sila!

⁷⁸ Nanagdahum sila, ang maong mga kaigsoonan, nga wala gayud sila’y panginahanglan alang sa usa ka tawo nga sama niana, mao nga, “Nganong dili na lang nato siya ipapahawa?”

⁷⁹ Mao kana, mao lang sa gihapon ang nahitabo karon. Nagadahum sila, nga, “Tungod kay nagka-intelektuwal na ang among mga kaiglesiahan, nga ania na kanamo ang pinakamaayong-mamisti nga mga tawo, ang pinakadakung organisasyon, ang pinaka-maantigo nga mga ministro, wala na kami panginahanglan sa Balaang Espiritu sa kung unsa Kini kaniadto.” Nga, puno na sila. Sa ubang pinulongan, mas kusog mosulti ang mga ginabuhat kay sa ginasulti. Nga,

ang ilang mga seminaryo, ug ang ilang...ang pangutok sa ilang—ilang pagkatawo, ug ang ilang pagtipon-tipon ug—ug ang ilang paghisgot-hisgot sa niining butang, mas may kaarang pa, pinaagi sa kaugalingon nilang intelektuwal nga panghunahuna, sa paghan-ay sa Iglesia, nga mas maayo pa kay sa kung unsa ang mahimo niini sa Balaang Espiritu. Busa, dili na nila Kini kinahanglanon pa. “Butang Kini nga dili na namo kinahanglanon karon. Kini, milabay na ang mga adlaw niana.” Karon, dili ba tinuod gyud kana? [Nagaingon ang kongregasyon, “Amen.”—Ed.] “Dili na namo gikinahanglan ang Balaang Espiritu sa pagpang-ayo sa masakiton. Aduna na kami mga doktor. Dili na namo kinahanglan ang Balaang Espiritu aron nga makasulti og laing mga dila. Maalamon na kaming tanan.” Ug sa dihang ginabuhath n’yo kana, inyong ginawagtang, gikan sa inyong pundasyon mismo, ang Panugtong-sa-Kinabuhi.

⁸⁰ Nag-ingon si Jesus ngadto kanilang mga Judio, sa Iyang mga adlaw, “Wala ba ninyo hibasahi kana, ‘Nga ang gisalikway nga Bato kaniadto mao ang Ulohag-Bato sa Pamag-ang nga gikatarukan sa tibuk bilding?’”

⁸¹ Karon, nakita n’yo ba kung unsay akong pasabot? Sigurado ako nga inyo—inyong nasabtan kana. Nga, ang—ang hinungdan sa niini karon, maoy tungod nga nagdahum sila nga dili na gayud nila Kini kinahanglan. “Dili na namo kinahanglan ang mga nagasulti sa laing mga dila. Dili na namo kinahanglan ang mga maghuhubad sa mga dila. Dili na namo kinahanglan pa ang pang-Daang Tugon nga mga propeta aron ihan-ay kami sa husto, pinaagi sa Balaang Espiritu. Nasabtan na namo Kini.” Kita n’yo? Midawat na sila og usa ka hinimo’g tawong sistema aron ipuli sa Balaang Espiritu.

⁸² Mao nga, adunay mga tawong pinili, nga nakasulat ang ilang mga ngalan diha sa Libro sa Kinabuhi sa Cordero, dili nila madawat kana. Espirituhanon silang maghunahuna, ug busa dili sila makadawat niana. Dili nila maagwanta kini, bisan pa kung dugay nang nagkinabuhi ang ilang mga amahan ug inahan diha sa unsa man nga iglesiang organisasyon.

⁸³ Pagmanglihok ang usa ka iglesia, nagapamuhath, dili tingaling diretso nga isulti kana. Oh, dili. Dili nila kini isulti nga diretsahan, pero ang ilang mga lihok nagapamatuud niini. *Ania* ang Pulong. Ug ang Balaang Espiritu ang nagapamatuud niini sa taliwala niadtong mga tawo, sa diha nga mahitigum Niya sila, nga sa gihapon nagapang-ayo Siya og mga masakiton, ug nagabanhaw og mga patay, ug nagasulti og laing mga dila, ug nagapagula og mga yawa. Busa, nakadepende kini diha sa... kung unsa ang kinasuloran sa usa ka tawo.

⁸⁴ Si Mrs. Arganbright dinha, gihunahuna kana, sa miaging adlaw, sa atua siya niadto sa agianan, nga nagapang-ibot og mga sagbot, sa dihang ginapamutlan niya niadto ang balilihan.

Nakaagi ako, sa tupad niya mismo. Wala niya ako nailhan, ug gipasagdan ko lang siya. Ginatan-aw ko siya niadto.

Karon himatikdi ang Balaang Espiritu diha sa Iyang kahalangdong buhat.

⁸⁵ Gibati sa iglesia nga wala na siya nagkinahanglan og Balaang Espiritu. Sultihan ka niana sa mga kaiglesiahan. Ug mahimo nang motindog ang mga kalalaken-an ug hatagan kamo og ingon nianang intelektuwal nga panulti, nga halos mapatoo ka niini. Karon mohunong kita dinha, sa kadali. Dili ba nag-ingon man si Jesus nga ang duha halos magkapareho na gayud, “Ipahisalaag niini ang mismong mga Pinili kung arang mahimo”? [Nagaingon ang kongregasyon, “Amen.”—Ed.] Pagkahapsay gayud ang maong mga pagpanulti, nga himoon niini—ipahisalaag niini ang mga tawo. Ang ebanghelyo kini, mga tawo kini nga makadala nianang pulong sa ingon nianang paagi, nga mahimo niyang buhaton halos ang si kinsa man nga tawong intelektuwal, kung mosalig ka lang diha sa ilang pagka-intelektuwal. Ilang—ilang kondenahon ang Balaang Espiritu, ug—ug pilion ang pamaagi sa tawo. Makita nato kana.

⁸⁶ Karon, ingon niana sa gihapon ang ilang gihunahuna bahin kang Joseph, ug ila siyang gipalagpot. Ug, oh, didto sa Egipto, oh, daw sa unsa natong mahunahuna, daw sa unsa ko ka gustong mogahin og mga oras dinha. Mahimo kang mopabilin dinhi sulod sa tulo ka tuig ug nga dili gayud makabiya nianang hilisgutan, sa adlaw ug gabii, ug makakaplag ka sa gihapon og halangdong mga lugas sa Balaang Espiritu. Makalantaw ang espirituhanong hunahuna didto sa Egipto ug makitang nagaabot kadto nga mga pagpanglutos; makita si Joseph nga gikuha na, aron nga mahimo nang moabot ang maong mga pagpanglutos. Ug dayon makita ang Dios, nga anaa ang Iyang ligid sulod sa maong mga ligid, nga nagatuyok ang tanan sa sibo gayud. Makitang ginasalikway ni Potiphar si Joseph; makitang gisulti ang kadto nga bakak. Ug makitang anaa sulod sa bilangguan si Joseph, ug nga mitaas na ang iyang bungot, nga ekskomunikado sa iyang mga kaigsoonan. Pero dayon, sa kalit lang, milihok na ang Dios. Kita n’yo?

⁸⁷ Daw sa unsa nga makita nato kana nga ligid sulod sa maong mga ligid, nga nagalihok! Ang dakung plano sa Dios nga nagapalihok sa tanan-tanan ngadto sa niining exodo, ngadto niining panahon sa diha nga pagatawagong Niya na ang Iyang katawhan pabalik sa mao nga kayutaan pag-usab, pabalik sa maong lugar, sa puwesto kon diin nga mahimo na Niya silang mapanalanginan ug mapahimutang na sa ilang taliwala ang maong Usa nga gisaad Niyang ipahimutang sa ilang taliwala. Gikinahanglan nga maanaa sila sa ilang yuta. Hinumdomi, gikinahanglan nila nga mogawas sa yuta nga gipuy-an nila niadto, ug mosulod na sa yutang saad, sa dili pa mahimong moabot ang gikasaad kanila nga Mesiyas.

⁸⁸ Ug mao sa gihapon ang gikinahanglan nga buhaton sa Iglesia; ang paggawas gikan nianang grupo sa mga tigsalikway, pasulod ngadto sa saad, sa dili pa mahimong igapadayag sa ilang atubangan ang Mesiyas. Makita ba ninyo kini? [Nagaingon ang kongregasyon, “Amen.”—Ed.] Ang Kinabuhi sa Mesiyas, nga nahipadayag, nga nagapahiandam sa Iglesia, ang usa ka Pangasaw-onon.

⁸⁹ Ang babaye nga nagapakasal sa usa ka lalaki, ug mosukwahi sa maong lalaki, mamahimo kining usa ka—usa ka paglinalisay, nga padayon na lang. Apan kon ang lalaki ug ang iyang asawa, iyang trato, iyang pangasaw-onon, pag-anaa sila sa hingpit nga panagkauyon, maingon nga usa ka kalag ug usa ka panghunahuna, tungod kay mamahimo na sila nga usa ka unod.

⁹⁰ Kung ingon-ana, nga sa diha ang Iglesia mahimo na ang ingon nianang pagpakig-uyon sa Dios, hangtud nga ang kapadayagan sa Pamanhonon nahipadayag na diha sa Pangasaw-onon, tungod nga mamahimong usa na sila! Oh, usa ka pagkadakung leksyon. Bueno.

⁹¹ Karon, hinumdumi, makuha kini sa espirituhanong hunahuna, makita ang maong tipo ug ang ante-tipo, ug masabtan kini. Sa usa, lang, makagahin kita og mga oras niini. Tan-awa kung unsa ang nagakahitabo.

⁹² Ug nganong nanaghulat man kita sa tanan niining mga katuigan, sukad niining owasis sa panahon? Kahibalo na mo, nagaingon ang Biblia, nga, “Ang iglesia mikalagiw ngadto sa kamingawan, kon diin gipakaon siya sa mga panahon ug panahon.” Ug nganong nagkaingon-ani man kini tanan? Aron nga atong . . . Kita n’yo? Ang mga ligid kini sa gihapon sa Dios nga anaa niini nga mga ligid.

⁹³ Nganong wala man gibuhat kini sa Dios, sa una pang panahon, sa diha nga manglingkod ang mga kalalaken-an kaniadto nga may mga lapis, ug—ug ang mga kababayen-an usab, ug nga nanagsulay niadto sa pagbanabana sa panahon? Sama kang Judge Rutherford ug daghan pa kanila, nga kono, “Moabot na si Jesus sa tuig ’14.” Ug—ug si Mother Shipton, nagbanabana niini sa mas una pa kay niana, ug uban pa, tanan na niining mga panahon. Ug, kita n’yo, sa pagbuhat nila niini, pinaagi sa kung giunsa nila pagpaningkamot nga sabton ang Kasulatan, kita n’yo, gidaot nila kini. Gitago kini. Gitago gyud kini. Ug unsaon man pagsupak sa Kasulatan sa Kaugalingon Niini, sa dihang giingon na ni Jesus, “Wala’y tawong nahibalo sa maong takna o oras?” Kita n’yo? Kita n’yo? Ginakuha lang nila ang usa ka bahin sa Kasulatan ug kuptan na Kini.

⁹⁴ Kinahanglan nga kuhaon mo ang tibuok Butang. Dayon, kung anaa ang Dios dinha, kung ingon-ana igapadayag kana sa Dios nga mao ang Kamatuoran. Sama sa Balaanong pagpang-ayo, kung dili kini Kamatuoran, kung ingon-ana dili gyud kini

Kamatuoran; dili magkaaduna og unsa man nga kahilambigitan ang Dios niini. Apan kung ginapadayag Niya Kini ingon nga Kamatuoran, nan Kini gayud ang Kamatuoran. Sama sa kung giunsa ni Jesus . . .

⁹⁵ Nag-ingon ang Dios, “Kung aduna ma’y usa sa taliwala ninyo, nga usa ka propeta, o espirituhanon, magasulti Ako ngadto kaniya. Ug kung nagakatuman ang unsa man nga iyang ginasulti, nan patalinghugi kini. Mao na kana. Apan kung nasayup ang iyang propesiya, kung ingon-ana . . .” Dili mahimong masayup ang Dios. Siya wala’y-kinutuban, dili masayup, makagagahum-sa-tanan, ug dili Siya mahimong masayup. Busa, kung nagasulti ang maong tawo, kung ingon-ana ginapakita niini ang mao nga tawo. Kung kaugalingon niyang mga pulong ang iyang ginasulti, mapakyas gayud kini. Apan kung ginasulti niya ang mga Pulong sa Dios, dili kini mahimong mapakyas, tungod kay Dios kini ang nagasulti. Kung ingon-ana, nagagikan sa Dios ang iyang dihog, ug mamahimo kini . . . mamahimo gyud kini nga husto. Sa ingon nianang paagi ang gisulti sa Dios nga isulti kini. Sa ingon nianang paagi nga ang Bib- . . .

⁹⁶ Diha sa Daang Tugon, nag-ingon Siya, “Kung wala sila nagasulti sumala sa kasugoan ug sa mga propeta, tungod kini kay wala’y Kinabuhi diha kanila, wala’y Kahayag diha kanila.” Husto. Kinahanglan nga managsulti sila sumala sa kasugoan ug sa mga propeta. Ug ang usa ka propesiya, o unsa man, gikinahanglan nga nagasubay sa Pulong. Kung dili man, sayup kini. Kita n’yo?

⁹⁷ Karon, makita nato nga tanan kini nangahitabo, tungod kay, naghulat. Mga rebaybal: ang mga Methodist, ang Lutheran, ang mga Baptist, ang mga Campbellite, ug—ug ang tanan nang nagkalain-lain pa. Nagkaaduna sila og mga rebaybal. Ang Nazarene, Pilgrim Holiness, mga Pentecostal, ang tanan na nagkaaduna og mga rebaybal. Apan wala miabot ang dakung exodo. Ngano man? Giingnan sa Dios si Abraham nga Iya siyang papuy-on sa mismong yuta didto, apan ang—ang pagkadautan sa mga Amorehanon niadto wala pa mapuno. Ug naghulat ang Dios, nagpailub. Silang mga tawo, paningkamotan nga sabton, pagmakita nila ang Kasulatan nga may ginapahinungdan. May ginapahinungdan sa kung unsang butang, moingon sila, “*Kini* na ang maong adlaw. *Kini* na ang maong panahon.” Apan nangapakyas kamo sa pagsabot nga ang pagkadautan sa mga Amorehanon wala pa matuman hangtud karon.

⁹⁸ Upat ka gatus ka tuig silang magmahimong dumuloong didto sa Egipto, ug ipahigawas. Apan sa tinuod mipabilin sila didto sulod sa upat ka gatus ug kuwarenta ka tuig, tungod sa pagsalikway sa maong propeta. Gikinahanglan nilang moantus og dugang pa, nga kuwarenta ka tuig didto sa kamingawan, sa wala pa sila gipahigawas sa Dios. Atua si Moises sa kamingawan

sulod sa kuwarenta ka tuig sa wala pa gayud siya nakabalik aron luwason sila, nakita n'yo. Misobra og kuwarenta ka tuig, ang pagkalagpas, tungod nga gisalikway nila ang mensahe.

⁹⁹ Karon, ang kuwarenta ka tuig sa atong orasan kung itandi mo diha sa orasan sa Dios, mahimong mga usa ug tunga lang ka minuto. Ingon niana kung unsa ka daku ang diperensya niini. “Ang usa ka libo ka tuig usa lang ka adlaw.” Kita n'yo? Wala gani kini mag-usa ka minuto, halos. Timan-i, kana.

¹⁰⁰ Karon ania na kita sa kaulahian. Ngano man? Dugay nang nagpailub ang Dios, nagsige'g hulat, nagbantay. Gitugotan ang—gitugotan motungha ang mga Lutheran diha sa usa ka rebaybal, dayon nag-organisa na. Gitugotan nga motungha ang mga Methodist diha sa usa ka rebaybal; nag-organisa. Gitugotan si John Smith, ang iglesiang Baptist, nga motungha pinaagi sa usa ka dakung rebaybal; nag-organisa. Gitugotan motungha ang mga Pentecostal pinaagi sa pagpanag-uli sa mga gasa; nag-organisa. Hangtud nga ang pagkadautan diretso nang napuno, dayon gikapuyan na ang Dios, nan nagkaaduna na og usa ka exodo.

¹⁰¹ Ug makita nato kini, nga silang mga tawo mismo makalantaw balik sa agos sa panahon, nga tinunglo ang maong butang. Mikuha sila og usa ka barita ug usa ka matahum nga kupo nga iya sa Babilonia, pag-usab. Ug mao kana nga butang ang nagapatunglo sa mga tawo, sa dihang sulayan na sa tawo nga ipasulod ang kaugalingon niyang mga ideya bahin sa mga butang.

¹⁰² Gikinahanglan nga magpabilin kita niana nga Pulong. Mao kana ang sugo sa Dios, ang, “Dili pagtandog sa bisan unsa man nga butang nianang siyudad, nianang tinunglo nga siyudad. Ayaw pagtandog niini. Pasagdi lang kini.”

¹⁰³ Ug nagdahum si Acan nga mahimo niyang dalhon kining barita nga bulawan ug magkinabuhing disente sama sa tanang uban pa sa kalibutan, ug ang matahum nga kupo nga iya sa Babilonia. Oh, ang mga Acan gayud sa maong mga kampo! Kita n'yo? Apan tinunglo ang maong butang, ug padayon kini nga tinunglo. Tinunglo na kini sukad pa niadto mismong Konseho sa Nicæa, sa Nicæa, Roma, tinunglo na sukad pa niadto. Apan gitugotan lang sa Dios nga mapuno ang pagkadautan, hangtud nga ang panahon sa mga Amorehanon halos mamatuman na.

¹⁰⁴ Ug karon ang si kinsa man nga adunay espirituhanong pagpanabot, hinumdumi, padayon kong ginaingon, *espirituhanong* pagpanabot, makita ninyo nga puno na ang pagkadautan niining nasura. Nag-organisa siya ug nag-organisa na usab, ug nagsige'g organisa ug nag-organisa pa. Ug karon nahimo na siyang konpederasyon, ug nakighiusa sa uban pa. Napuno na ang pagkadautan. Panahon na alang sa exodo, panahon na sa pagtawag pagawas, ngadto sa Yutang gisaad.

Dili saad nga, usa pa ka nasud nga pagaadtoan; kondili usa ka Puluy-anan, ang Milenyum, panahon na alang sa pagtawag pagawas. Ang pagkadautan sa niining nasud (mohisgot ko og usa pag-usab unyang gabii, kon itugot sa Ginoo) napuno na. Pagkangil-ad na niya.

¹⁰⁵ Moingon mo, “Igsoong Branham, ang nasud ba nga gikapuy-an mo?” Oo, sir. Mao gyud. Moingon mo, “Ingon nga usa ka lungsuranon sa Estados Unidos, dili ka angay mosulti niana.” Kung ingon-ana, wala unta mitawag si Elias og usa ka tunglo niadto sa Israel, ug nga siya ingon nga usa ka Israelinhon kaniadto. Ang tanang uban pa nga mga propeta wala unta gayud gitunglo kana nga nasud kon diin mga sakup sila kaniadto ingon nga mga Israelinhon.

¹⁰⁶ Apan ila lang niadto gisulti, dili ang kaugalingon nilang mga panghunahuna, kondili ang Pulong sa Dios. Kita n’yo? Nakadepende kini kung asa mo ginakuha ang imong dihog. Nakadepende kung sa unsang paagi kini nagaabot. Kung sukwahi man kini sa Pulong, pasagdi kini. Ginahangyo ko ang si kinsa man nga pamatud-an nga sukwahi Kana sa Pulong.

¹⁰⁷ Dili ba nag-ingon man ang Biblia, diha sa Pinadayag 13? Dinha kon diin kining nasud makita. Ginumerohan kini nga nasud nga trese, usa ka nasud nga iya sa babaye. Usa kina ka babaye, diha sa Biblia. Babaye ang anaa sa atong mga salapi. Usa kini ka nasud nga iya sa babaye. Dinhi kon diin ang kadautan sa mga babaye nagasugod, nagasugod, kon diin dinha usab nagatapos. Misugod ang kadautan didto sa Eden, tungod sa dili-pagtoo sa Pulong sa Dios. Dinhi kon diin nagsumikad ang mga babayeng magwawali ug tanan nang uban pa. Ang kahugawan sa kalibutan nagagikan mismo sa Hollywood, ang pinakadautan nga nasud sa kalibutan; mas daghan ang mga panagbulag, bisan hiusahan pa ang sa tanang uban pa sa kalibutan. Kita n’yo? Ngano man? Mahibaloan ninyo kini usa sa niining mga adlawa, kon itugot sa Ginoo. Makita ninyo kon ngano, tinunglo kini nga butang. Makita ninyo ang pagkabuta bahin niining butang nga panagbulag nga gitabon ni Satanas diha sa mga mata sa mga tawo. Ania na kita sa usa ka makuyaw nga takna. Halos haduol na gayud ang atong katapusan karon, nagatoo ako. Pagkadautan na nila, dautan hangtud sa kinasuloran.

¹⁰⁸ Makita siya diha sa Pinadayag 13, numero trese. Ug hinumdumi, mitungha kini nga usa ka carnero, pang-relihiyon nga kagawasan. Apan unya midawat kini og gahum nga gikan sa mapintas nga mananap; usa ka larawan nga sama niini. Ug misulti siya nga aduna nianang tibuok kagahum, ug gibuhat ang mao rang dautan nga mga butang nga gibuhat niadto sa maong mapintas nga mananap sa wala pa siya. Kung ingon-ana sultihi ako kung wala ba kini gipropesiya bahin niining nasura? Ang Amorehanong kahimtang halos hinog na gayud, tungod kay ginalihok na nila kini.

109 Ug bisan ang atong bag-ong papa, ang pinaka-katuyoan niya mao nga hiusahon na ang tanang mga managsoon. Ug, ngadto sa natural nga mata, kini ang butang nga angay gyud pagabuhaton. Pero, sa mata sa Dios, supak kini sa Balaang Espiritu. Dili kita mahimong makigsagol dinha. Ug ang matag iglesia ipapahisakup na niana nga pederasyon. Panggawas kamo gikan nianang butanga, sa ingon ka agpas nga mahimo n'yo. Madawat ninyo ang marka sa mapintas nga mananap, nga wala nahibalo kung unsa ang inyong ginabuhat. Panggawas kamo niana.

110 Nagalaum ako nga masabtan kana sa espirituhanong panghunahuna. Sigurado akong nasabtan ninyo. Apan unsa kaha, didto. Bisan unsaon pa, dili mo mahimo ang pagbisita sa tanang nasud. Makapadala ka og mga teyp ngadto niini. Aduna sa kung unsang pamaagi ang Dios nga maabot kana nga hunahuna didto kon diin man mapugas kana nga binhi. Husto. Ug sa dihadiha nga maigo kini sa maong Kahayag [Gipakpak ni Igsoong Branham sa makausa ang iyang mga kamot—Ed.], wala na, nagakaaduna na kini og Kinabuhi. Sama sa gamay'ng babaye didto sa atabay, miingon siya, “Mao na Kini.” Nakuha niya Kini.

111 Panggawas kamo gikan nianang butanga. Tinunglo kini. “Tinunglo?” Sultihi ako kung aduna ba gayu'y usa nga nahulog na ug nakabangon pag-usab. Sultihi ako og usa nga giorganisa nga wala gayud mahulog. Busa, makita ninyo nga ang maong butang sayup. Bueno.

112 Wala pa napuno ang pagkadautan, sa mga Amorehanon, mao nga gikinahanglan nilang magdugay pa ug maghulat sa dili pa ang exodo. Apan sa diha nga napuno na ang pagkadautan sa mga Amorehanon, didto na dayon miabot ang usa ka espirituhanong exodo, o ang natural nga exodo, aron nga magiyahan ang katawhan paingon sa usa ka natural nga kayutaan, kon diin didto nagpuyo sa una ang natural nga Amorehanon, nga gitawag nila kadto nga ilang yuta.

113 Ug ang pagkadautan sa Amorehanong denominasyon nagpatawag sa ilang kaugalingon nga “ang Iglesia,” sa dugay'ng panahon, hangtud nga miabot na halos sa pinakagrabe gayud ang ilang pagkadautan.

114 Adunay usa ka exodo nga moabot, kon diin igapakita sa Dios kung kinsa ang maong si kinsa; kon diin ang Iglesia Mismo, ang Pangasaw-onon ni Jesus Cristo, pagadalhon diha sa usa ka exodo, paingon sa Yutang gikasaad. “Sa Balay sa Akong Amahan daghang puy-anan, sa niining lugar.” Dili mo kinahanglan nga moadto Didto ug nga makigbugno pa sama sa gibuhat nila kaniadto. Nahiandam na Kini. Kung matun-as na kining yutan-ong gikapuy-an nga tabernakulo, aduna na kita'y usa nga nagahulat, “Aron nga diin gani Ako, atua usab kamo.” Nagakahiduo na ang maong dakung exodo!

115 Himatikdi kung giunsa sa Dios pagpahigayon nianang exodo, kung unsa ang Iyang. . . kung unsang mga pagpangandam ang Iyang gihimo, ug tun-an lang sa kadali, dayon tan-awa n'yo ang sa karon. Sige. Himatikdi, sa wala pa kini nga exodo, "Adunay mitungha nga usa—usa ka faraon nga wala makaila kang Joseph." Kita n'yo? Usa ka faraon nga wala makaila kang Joseph. "Wala makaila kang Joseph." Unsa ma'y ginasmobol kaniadto ni *Joseph*? Ang espirituhanong bahin niining espirituhanong exodo.

116 Adunay nagapanungha karon, "Dihay kagawasan nato." ("Gipakaon niadto ang babaye sulod sa usa ka panahon, sa panahon, ug sa katunga sa panahon.") Apan sa kaulahian adunay mitungha og usa—usa ka Jos-. . . o usa ka diktadoryang faraon nga wala makaila sa pang-relihiyong kagawasan, ginapahiusa na silang tanan. Ayaw kini ipalagpas kaninyo. Moabot ang panahon nga adunay usa ka faraon, usà, nga gikinahanglan moabot.

117 Ug nagkinabuhi sa kalami ang mga organisasyon, nagkinabuhi ingon nga usa ka sanga nga sinumbak, ngadto sa tinuod nga punoan sa Cristianismo, apan ginapamunga niini sa gihapon ang iyahang mga bunga: mga kababayenan, nga halos hubo na; mga kalalaken-ang, intelektuwal, ug ginapanghimakak ang gahum sa Espiritu. Pero, nagkinabuhi kini ilalum sa ngalan sa iglesiang Cristohanon. Usa kini ka sinumbak nga punoan sa parras. Apan paanhi na karon ang Mag-uuma aron kaponon kana nga punoan, sama sa giingon na Niya nga Iyang pagabuhaton. Ang tanan kadto nga wala'y bunga pagaputlon ug isalibay ngadto sa kalayo ug nga maugdaw.

118 Makalilisang kini nga butang aron isulti, apan ang Kamatuoran usahay daw sa makalilisang gayud. Sama sa giingon ko na kaninyo, kung giunsa sa Dios pagdala sa Iyang mga kaanakan patabok sa halawum nga mga tubig ug sa mga lapukon nga mga kabalasan ug ingon-anang butang. Ginabuhat Niya kini sa ingon nianang paagi. Hinumdumi, ang—gikinahanglan nga madugmok ang kulon, magkabuak-buak, magkapikas-pikas aron nga mahulma utro ug mabalay pag-usab. Daw sa pagkalisud nga butang ang pagbuak niini, apan gikinahanglan nga mamaingon niana kini, aron ang maong kulon maihulma pag-usab, ang plorera o unsa man nga imong ginahulma.

119 "Adunay mitungha nga usa ka faraon, nga wala makaila kang Joseph." Ug mao na kadto ang pagsugod sa sinugdanan. Mao na kadto ang pagsugod sa exodo. Ug sa diha nga misugod na pagporma kanang butanga, ilalum sa usa—usa ka pulitikanhong gahum, nga misugod na pagporma, misugod na pagpangandam ang Dios. Natuman na ang pagkadautan sa mga Amorehanon. Ang panahon nga gisaad Niya kang Abraham miabot na, ug haduol na ang panahon sa kaluwasan.

¹²⁰ Ug gipahanugotan sa Dios nga motungha ang usa ka faraon, nga wala makaila kang Joseph, ug natawo si Raamses. Ug pagkatapos mismo ni Seti miabot si Raamses. Ug si Raamses kadto ang wala nasayod sa mga panalangin kang Joseph. Ug—ug wala siya nasayod kung unsa niadto ang bahin sa espirituhanong butang. Maayong laki lang siya sa pulitikanhong butang, nga mahimo niyang sakupon ang Etiopia ug ang tanang uban pang mga nasud, ilalum sa pang-militar nga puwersa. Ug mao lang kadto ang nahibaloan niya, ang—ang pang-militar nga puwersa.

¹²¹ Ug siguro, kung may tawo man nga espirituhanon, masabtan niya kung unsa ang nagakahitabo karon. Nagakaaduna na kita og usa ka faraon nga wala makaila kung unsa ang kagawasan pang-relihiyon. Sa diha nga naphimutang sa iyang katungdanan ang atong presidente, ayaw niyang panumpaanan kana, nga nagtoo siya sa kagawasan pang-relihiyon.

¹²² Unsa na usab niadtong miaging adlaw sa diha nga nagkaaduna kita niining problema sa segregasyon, didto sa Habagatan? Sa diha nga kining gobernador sa—sa Alabama. . . Maestorya ko lang unta kana nga ministro, kanang si Martin Luther King. Giunsa man pagkahimong lider sa mao nga tawo, ug nga ginadala niya ang iyang mga tawo ngadto sa lit-ag sa kamatayon? Kung ulipon kadto nga mga tawo, atua na unta ako didto, gihukas na ang akong amerikana, nakipagbugno alang niini nga mga tawo. Dili sila mga ulipon. Mga lungsuranon sila. Mga lungsuranon sila sa nasud. Ang problema maoy “pagsulod sa eskwelahan.”

¹²³ Kini nga mga tawo, kung magahi man ang kasingkasing nila ug wala nahibalo nianang mga butanga. Dili mo mahimong ipamugos ngadto sa mga tawo, ang espirituhanong mga butang, kung aduna na’y naidukdok dinha nga gigamit ang pulitikanhong mga gahum. Kinahanglan nga dawaton nila kini, nga matawo pag-usab, dayon dinha na nila makita kining mga butanga.

¹²⁴ Apan, kining tawhana, kung makaestorya lang ako unta kaniya; ginapangunahan kining bililhong mga tawo, ilalum sa ngalan sa relihiyon, ngadto sa usa ka lit-ag sa kamatayon kon diin patyon niya sila sa linibo ka linibo! Wala nila. . . Gitan-aw lang nila ang—ang natural nga bahin.

¹²⁵ Kining tawhana, kining itum nga igsoon, sa nahitabo ang kadtong dakung pagpanukol didto sa Louisiana, atua ako niadtong higayona. Sa dihang ang. . . Adunay usa ka itum nga ministro, bililhon og tigulang na nga igsoon, mitindog didto ug miingon, gihangyo ang mga sundalo, “Mahimo ba nga makigsulti ako kanila? Akò silang mga kabanay.” Ug mitindog kining tigulang nga ministro, didto, miingon, “Gusto kong isulti, karong buntaga, nga wala ko gayud ikaulaw ang akong kaitum. Ang akong Magbubuhay maoy nagbuhay kanako kung unsa ako.”

126 Gusto niyang magpabilin sa pagkaingon niana. Sa ingon niana Niya gusto nga magpabilin ang matag tawo. Nagabuhat Siya og mga puti nga bulak, ug mga asul nga bulak, ug tanan na nga mga kolor sa bulak. Ayaw sila isagol-sagol pagpaliwat. Ayaw isagol-sagol ang ilang kaliwat. Ginabatokan mo ang kinaiyahan.

127 Ang ingon niya, “Wala ko gayud ikaulaw ang akong pagkaitum, hangtud niining buntaga.” Ingon niya, “Pagmakita ko ang akong kabanay nga nanagpanukol ug ginapamuhat ang mga butang nga ilang ginabuhat karon,” ingon niya, “Ginapaulaw ako niini tungod kanila.” O Dios, panalangini kanang tingoga. Ingon niya, “Nagahatag lang kamo og hinungdan sa mga kagubot.” Ang ingon, “Tan-awa ninyo ang mga eskwelahan dinhi. Kung wala kita unta mga eskwelahan,” ingon pa, “mahimong may diperensya gyud. Apan kinsa man ang adunay pinakamaayong mga eskwelahan dinhi sa Louisiana?” Miingon, “Kuhaon nato, pananglitan, ang atong siyudad, ang Shreveport.” Miingon, “Adunay usa ka eskwelahan didto sa mga puti, karaan na kini nga eskwelahan. Gipaturoran nila kita og usa pa. Wala sila ni usa ka instrumento, ni usa ka padulaan para sa mga bata. Kita adunay pagkadaghan nga dulaanan. Ug wala pa’y labot niana, gipaturoran nila kita og usa ka halapad, dakung, marmol nga swimming pool para sa atong mga bata. Ug aduna pa kanato ang pinakamaayong mga magtutudlo nga mahimong makuha.” Miingon pa, “Nganong gusto n’yo pa man moeskwela didto, sa dihang aduna man kita’y usa nga mas maayo pa dinhi? Unsa ma’y nahitabo kaninyo?” ingon niya.

128 Ug silang mga tawo, sila’y nag, “Rah!” Gilabwan nila ang tingog. Tan-awa, kita n’yo, sayup nga pagka-inspirasyon.

129 Kung mga ulipon pa silang mga tawo. Ako silang mga igsoong lalaki ug babaye. Kung mga ulipon pa sila, moingon ko, “Ubanan nato sila ug mangadto sa karsada ug protestahan kana nga butang.” Dili sila mga ulipon. Mga lungsuranon sila nga adunay kaparehong mga katungod nga aduna ang si kinsa man. Usa lang kini ka pundok sa inspirasyon nga nagagikan sa impiyerno, nga mamahimong hinungdan nga mapatay ang usa ka milyon kanila. Ginasugdan nila ang usa ka rebolusyon. Siguradong, mao gyud. Dili kini husto.

130 Aduna ang mga kalalaken-an ug mga kababayan-an og kaugalingon nilang mga katungod. Ang itum natong mga kaigsoonan, ug ang atong mga Hapon, ug mga dalag, puti, itum, ug kung unsa man sila. Wala’y diperensya ang kolor sa usa ka dios. Gikan kitang tanan sa usa ka tawo, kang Adan. Apan kung gipanglahi-lahi kita sa Dios ug gihimo kitang magkalahi ang kolor, magpabilin kitang ingon niana. Kung ako man usa—usa ka dalag nga tawo, gusto kong magpabilin nga usa ka Hapon, o Intsik. Kung ako man usa—usa ka itum nga tawo, gusto

kong magpabilin nga ingon niana. Gihimo man ako sa Dios nga ingon niana.

¹³¹ Sa tinuod lang, daghan kaayo ang mahitungod sa itum nga kaliwat nga aduna unta sa kaliwat nga puti. Wala sila’y mga pagkabalaka. Mas espirituhanon sila. Adunay linibo ka mga butang bahin kanila nga dili man lang mahimong abton sa tawong puti. Ingon niana ang pagkahimo sa Dios kanila.

¹³² Kinsa ba ang makakanta nga mas maayo pa kay sa itum nga choir? Asa ka man makakita og ingon nianang mga tingog? Nakita ko sila nga mga gikan pa sa halayong mga kayutaan nila didto, nga wala nahibalo kung hain man, ang tuo ug wala nga kamot. Traynta o kuwarenta ka mga nagkalainlaing mga tribu nila, ug mokanta sila ngadto sa punto, nga ang maestro nga nagatindog didto, moingon, “Dili ko kini maabot pa.” Nagtudlo siya og mga choir sa daghang mga tuig, ug ang usa mas hataas og usa ka octave, ug ubus ang usa, ug tanan na. Miingon, “Paminawi kana, pagkahingpit gayud, bisan sa nagkalainlaing mga pinulongan.” May mga gasa sila.

¹³³ Apan, nakita n’yo, tanan niining mga butanga kinahanglan mahitabo, tungod lang sa usa ka politiko nga giboto ninyo nga mga tawo pinaagi sa inyong mga balikog nga mga makina.

¹³⁴ Ug sa miaging adlaw, sa dihang mitindog kana nga gobernador didto, nanumpa ug pinili ngadto nianang katungdanan, sa mga tawo, ug ang problema bahin sa segregasyon kono sumala sa konstitusyon mao, nga ang matag–matag estado mahimong gamiton ang kaugalingong panghunahuna niini bahin niana. Wala’y sapayan kaniya, pero gibasa niya ang konstitusyon, miingon, “Karon, nagabarug ang maong eskwelahan alang sa segregasyon.” Aduna sila’y usa ka eskwelahan didto. Ug adunay duha lang ka itum nga mga bata ang gustong moeskwela niana nga eskwelahan, sa dihang aduna man sila’y kaugalingong kolehiyo. Apan mitindog siya ug miingon, “Unsa?” Nabasa na gani niya ang konstitusyon.

¹³⁵ Dayon sa dihang miabot kini ngadto niining tawo nga aduna kita sa itaas dinhi, nga wala makaila kang Joseph, sa kagawasan. Nga ginahaylo ang mga boto sa mga itum, ug nga wala nasayod ang mga niini nga partido republican ang naghatag og kagawasan kanila, sa sugod pa lang. Gipamaligya na ang ilang mga katungod sa pagkapanganay, sa usa ka butang nga ingon niana, aron pangunahan sila ngadto sa lit-ag sa kamatayon, aron ipakita lang nga ang tanan nga hinimo’g tawong sistema mahugno gayud. Husto gayud. Ug gihimo ni Mr. Kennedy kadto nga kasundalohan nga pang-nasudnon na, ug gipadala kadto nga mga kalalaken-an pabalik nga inatbangay na mismo sa kaugalingon nilang mga amahan nga nagabarug didto ilalum sa maong konstitusyon. Gilapas niana usab ang konstitusyon.

¹³⁶ Miingon, “Dili kami makig-away. Dili, sir.” Ug miingon, “Nagalaum ako nga mahibaloan sa nasud nga wala na kita nagapuyo ilalum sa usa ka demokrasya, kondili ilalum na sa diktadurya pang-militar.”

¹³⁷ Nahibalo na mo sa karaang panultihon, “Pag-usa gani ka taga-habagatan nga democrat, ingon niana na kini hangtud-hangtud.” Wala na ko kahibalo sa karon. Uh-huh. Siguro aduna na ma’y igong panghunahuna ang usa ka tawo aron momata sa usa ka butang. Kita n’yo? Pasagdi na silang bililhong mga tawo. Ayaw sila pamatya, dinha.

¹³⁸ Sama nianang lalaki nga gipusil niya sa likod ang kadtong igsoon, sa miaging gabii, sa niana nga pusil, ug nga didto sa balay ang gagmay’ng mga anak ug asawa niini. Wala ko’y labot kung kinsa man siya, pagkangil-ad kadto ug pagkawalay-batasan. Oo, sir. Gusto ko mahimong maghuhukom niana nga kaso, sa makausa lang. Uh-huh. Uh-huh. Pusilon kadtong lalaki, nga pauli na sa iyang asawa ug mga anak. Usa kini ka lungsuranon, adunay katungod nga barugan kung unsa man ang ginahunahuna niyang husto, usa ka tawong buutan. Anaa ang litrato diha sa *Life* nga magasin, kadtong batang lalaki nga ginahilakan ang iyang daddy. Ug usa ka kriminal didto, ang mipusil kaniya sa likod, giatangan.

¹³⁹ Ingon niana ang makuha mo pag-gisalikway mo si Cristo. Husto kana. Ingon niana ang gikadangan sa tibuok niining nasud, ang tanan napailalum na sa politika. Ingon na niana kini ka makauulaw, apan mao man kana ang atong gusto. Gipamatud-an nato kini diha niining eleksyon.

¹⁴⁰ Ang gamay kong anak nga lalaki miingon kanako, niining buntag, “Daddy, ang magpapanaw ba natong mga amahan kaniadto, sa pag-anhi nila dinhi, sila bang tanan niadto nahisakup sa *niining* usa ka denominasyon nga iglesia? Sila bang tanan. . .” Ingon pa, “Nakasul-ob ba sila niadto og dagkung mga Amerikana?”

¹⁴¹ Ingon ko, “Dili, anak, Nanganhi sila dinhi tungod sa kagawasan pang-relihiyon. Mao kana ang ilang gianhian dinhi, aron makahilingkawas ilalum sa butang nga sama niadto.” Nakita n’yo kung asa na ang gipaingnan niini karon? Nagapakita lang nga ang tanan niini nga mga gingharian mohugno gayud.

Gikinahanglan ko nang dalion.

¹⁴² Usa lang ka butang, nagaampo ako nga si Igsoong Martin Luther King makamata gayud sa dili madugay. Nahigugma siya sa iyang mga kabanay; sa wala’y pagduhaduha. Apan kung makita niya lang unta kung asa na ang iyang inspirasyon. Unsa ma’y maayong mahimo niini kung makaeskwela ka, usa na man ka milyon kaninyo ang nagbuy-od didto, nga patay na? Dili ba kana, pareho lang nga, wala ka nakaeskwela? Karon, kung tungod pa—tungod pa sa kagutom, kung kini tungod pa

sa kung unsa nga ubang butang, sa pagkaulipon, mamahimong usa ka martir ang tawo nga ihalad niya ang iyang kinabuhi tungod sa ingon nianang katuyoan, usa ka mahinungdanon nga katuyoan, ug mamahimo kana nga usa gayud ka mahinungdanon nga katuyoan. Pero aron lang nga makaeskwela, ako—dili ko masabtan kini. Kita n'yo? Wala ko nagatoo nga ang Balaang Espiritu nagauyon kaniya, man lang, diha niana. Nahulhogan lang niini ang mga tawo, sa usa ka pundok sa walay kapuslanan, nakita n'yo.

143 Sama—sama gayud sa gihimo kaniadto ni Hitler, didto sa Alemanian, gipangunahan sila paingon ngadto sa usa ka lit-ag sa kamatayon, silang bililhong mga Aleman. Ug binilyon sila nga nangbuy-od didto, o minilyon, nga nagkatipun-og didto sa usa'g usa.

144 Ug eksaktong mao ra kana sa gihapon. Ug hinumdumi, naka-teyp ako. Makita ninyo kini, human sa, tingali pagkawala na nako. Ingon niana ang eksaktong magakahitabo. Silang bililhon nga mga tawo mamatay didto, nga sama sa mga langaw. Mosugod og usa ka rebolusyon, ang parehong puti og itum mag-away-away na usab, ug mangamatay nga sama sa mga langaw. Ug unsa na ang makuha ninyo pagkahuman na niining tanan? Usa ka tipun-og sa patay na nga mga tawo.

145 “Apan mitungha ang usa ka faraon nga wala makaila kang Joseph.” Ang mao ra sa gihapon karon, mitungha ang usa ka lalaki ug nanaad didto sa—didto sa White House, nga ayaw panumpaang ang iyang panaad, ayaw niyang mosaad nga nagatoo siya sa kagawasan pang-relihiyon.

146 Unsa ma'y ginasulti niining bag-ong papa? Usa . . . Upat ka butang nga aduna siya. Usa sa mga niini, mao ang hiusahon na ang mga Protestante ug mga Katoliko. Ug alang sa kinsa man nga intelektuwal nga tawo, mao gyud kana ang angay buhaton. Apan sumala sa Biblia, sayup kini nga butang aron buhaton. Ug nag-ingon ang Biblia nga buhaton gyud nila kana.

147 Magpadayon pa kita og dugang pa. Diha niining panahona, si Raamses, didto sa Egipto, nagadaku na. Nagadaku pa ang iyang gahum. Ang tawong natural, si Raamses, nagadaku na.

148 Ang tawong natural, ang anticristo, nagadaku usab sa karon. Pinaagi sa pulitika, nakaabot na siya sa White House. Diha sa relihiyon, napaduhaduha na niya og ayo ang mga tawo, hangtud nga mahaylo na niya gayud sila niini. Ug ang mga lider sa mga denominasyon, halos ang matag iglesia na nga aduna sa nasud, apil na sa maong konpederasyon sa mga kaiglesiahan. Nagadaku na si Raamses. Ug nagakahiusa na silang tanan, ug kana ang magkaaduna kanila. Ug unsa ang ginahimo niini? Nagaporma kini og usa ka gahum, usa ka mapintas nga mananap nga sama sa nahaunang usa.

149 Dayon adunay pagpanglutos nga moabot sa tanan niadtong dili makighiusa niini, ug usa ka pagboykot. Mamahimong ulahi na kaayo kini nianang tungora. Nadawat mo na ang maong marka. Ayaw pag-ingon, “Buhaton ko kini nianang tungora.” Mas maayo pang buhaton mo kini karon. Nagadaku na si Raamses.

150 Apan hinumdumi, samtang nga nagadaku niadto si Raamses ngadto sa pagkagamhanan, didto sa Egipto, aduna ang Dios og Moises didto sa kamingawan. Nagadaku siya niadto, usab. Aduna niadto si Raamses og pulitikanhong sistema. Aduna usab ang Dios og espirituhanong sistema, ilalum sa usa ka propeta, nga andam na nga moadto didto, aron makigsulti sa maong mga katawhan.

151 Pareho silang nagadaku usab. Moabot kini ngadto sa usa ka pagpakigsangka, usa sa niining mga adlaw. Dili na magdugay kon diin magkaaduna na og usa ka pagpakigsangka. Sama diha sa natural. . . Sama sa ginaingon sa Kasulatan, “Ginatipo sa natural ang espirituwal.” Dili ka makalingkawas niini. Anaa na dinha kini. Sa atubangan na kini mismo sa inyong mga mata. Kamatuoran kini. Tan-awa ang Iglesia karon, ginatawag na pagawas, paingon na sa pagkagamhanan. Ang Balaang Espiritu nga mikanaug, ginapadayag na ang mga tinago sa Dios ug nga ginapahimutang na sa kahan-ayan. Kita n’yo? Ug karon mismo, atua na siya sa White House. Ug ginabira na pahiusa sa Iglesia ang Kaugalingon Niini, amen, dili nga usa ka denominasyon; pagawas sa pagkaulipon gikan sa pagkadili-matarung, pahalayo sa mga Amorehanon, usa ka katawhan nga gawasnon. Oh!

152 Aduna niadto ang Dios og Moises, ang Iyang mamahimong propeta. Bisan pa nga nakapropesiya na siya niadto, ug gipamatud-an niini nga husto siya, apan sa gihapon atua siya sa eskwelahan sa kamingawan, gitago nga halayo sa tanang uban pa sa kalibutan. Apan gipaeskwela siya, nga ginabansay, didto sa kamingawan.

153 Iगतanyag sa mga kaaway, sa kanunay, ang iyang sistema. Ug dawaton kini sa kawalay pagtoo, tungod kay ang kaaway mao ang ilhanang intelektuwal.

154 Karon, hinumdumi, aduna lamang duha. Ayaw hikalimti kini. Aduna lamang duha ka gahum. Ang usa mao ang espirituhanong gahum, sa Balaang Espiritu. Ang laing usa mao ang Yawa, nga nagalihok pinaagi og intelektuwal nga gahum. Kay, dinha siya kaniadto misulod, didto sa tanaman sa Eden, pinaagi og intelektuwal nga mga gahum, aron ipatoo si Eva diha sa intelektuwal nga panghunahuna, batok sa Pulong. Pagka-klaro kaayo, mahimong masabtan kana sa mga bata. Kita n’yo? Kita n’yo? Ug ingon na niana kini sa una pa, hangtud karon.

155 Ania na kini, diha sa Egipto, niining buntaga. Adunay usa ka intelektuwal nga gahum nga nagapanglihok diha kang

Raamses, nga maoy nagapauswag kaniya ngadto sa gahum. Ug nagapadaku kaniya, nga wala makaila sa maong kagawasan aron pahanugotan kung unsa ang gihimo na ni Joseph kaniadto, kung unsay gihimo na sa iglesia sa sinugdanan.

¹⁵⁶ Ug karon makita nato ang mao ra sa gihapon nga butang, usa ka intelektuwal nga gahum nga nakasalapid sulod sa mga kaiglesiahan, ug midaku na kini ngadto sa pagka-pangulo sa simbahan nga dili niya igsapayan kung unsa ma'y giingon sa Biblia. Aduna na sila'y kaugalingon nilang sistema. Kini dili ang kung unsa ang giingon sa Biblia. Kini ang kung unsa ang giingon sa iglesia. Ug nakasalapid sulod mismo dinha ang mga Protestante, hangtud nga ang tanan nilang gagmay'ng mga grupo, ingon na niini, "Bueno, oo. Bueno, kahibalo ko nga *Ingon Niini* ang ginaingon Niini, apan sultihan ta ka, milabay na ang ingon niana nga mga adlaw."

¹⁵⁷ "May dagway sa pagkadiosnon, ug ginapanghimakak ang gahum." Diretso nga nakapunting ang matag Kasulatan ngadto niini.

¹⁵⁸ Karon nakita n'yo na kon ngano nga gusto kong iteyp kini ug ginapadala kini ngadto sa mga tawo. Miabot na ang takna. Kinahanglan nga mapahibalo na ang Kamatuoran. Haduol na ang maong pag-exodo. Kita n'yo?

¹⁵⁹ Ang—daw sa kahingpit gyud ang intelektuwal nga bahin kon tan-awon. Ug hingpit kini, eksakto gyud kini; pero, hingpit gyud, nga inspirasyon ni Satanas.

¹⁶⁰ Ug dayon, sa tanang panahon, nga, nagadaku kining intelektuwal nga Raamses ug nga papaduol na sa trono. Ug hinumdumi, gipadaku siya ingon nga usa ka igsoon ni Moises, kita n'yo, usa ka igsoong lalaki ni Moises. Kinahanglan ang usa kanila ang mokuha sa intelektuwal nga lingkoran, sama kang Joseph sa iyang mga kaigsoonan. Ug unsa ba ang ilang gibuhay niadto sa batang si Joseph? Giekskomunikar nila siya sa Pulong. Ang Pulong Dios. Ug ilang giekskomunikar ang Pulong, ug gidawat ang kredo. Ug karon ang kredo midaku na ngadto sa pagkagamhanan.

¹⁶¹ O Dios, tugoting makita kana sa mga tawo! Unsaon ko pa pagdugang og gamit sa akong tingog? Unsaon ko pa paghimo niini nga mapaklaro pa pinaagi sa Kasulatan, ilalum sa inspirasyon sa Balaang Espiritu, nga ania na gyud kami?

¹⁶² "Oh," moingon ka, "bueno, karon, kung gikan kana kang Papa Juan, o kang Papa *Ingon-ani-ug-ingon-ana*, o kang Obispo *Ingon-ani-ug-ingon-ana*!"

Makita n'yo ba nga ang Dios migamit og usa ka kabus, yanong magpupuyo sa disyerto?

Moingon pa, "Unsaon man pagkasayup niining tanan?"

163 Nagapakigtigayon ang Dios sa indibidwal, dili sa mga grupo. Sa indibidwal; ginakuha sa Dios ang mga Iya—ang mga Iya, ginakuha ang mga Iya. Ang butang lang nga gikinahanglan Niya mao ang magkaaduna og usa ka tawo nga malihokan Niya. Usa lang ka tawo ang gusto Niya. Gipaninguhaan Niyang gamiton sila, sa matag kapanahonan. Kung makakuha lang gayud Siya og usa ka tawo! Mikuha Siya og usa ka tawo sa panahon ni Noe! Usa ka tawo sa panahon ni Elias! Usa ka tawo sa panahon ni Juan nga Bautista. Usa lang gayud ka tawo ang gikinahanglan Niya. Sa panahon sa mga maghuhukom, misulay Siya pagkuha og usa ka tawo, si Samson, gihatagan kini og dakung gahum, apan gibaligya niya kini ngadto sa usa ka babaye ug gibutahan siya. Mga maghuhukom kadto; dili gyud nga ingon niana. Ang Dios mao ang maghuhukom. Kita n’yo?

164 Nakita n’yo, sa karon, nagapaninguha Siyang mokuha og usa ka tawo nga makontrola Niya diha sa Iyang kamot, nga mosulti sa Kamatuoran, nga mamahimong wala’y-kahadlok tungod niini, nga dili mopugong-pugong pagsulti, nga dili mamahimong dogmatiko; usa ka tawong makontrola Niya diha sa Iyang kamot ug nga mopakita nga buhi ang Iyang Pulong, ug ipakita Siya Mismo nga buhi. Nagatoo ako nga mahimo Niyang iandam ang ingon niana nga tawo. Nagatoo ako. Nagatoo ako niini. Ako gayud. . . igo gayud ang pagtoo ko sa Biblia, aron toohan nga makuha Niya kini, husto kana, nga mosulti sa Kamatuoran.

165 Pagkahuman sa pila ka panahon, makita nato, human nga nakaagi na sa tanan niining mga eskwelahan. Karon bantayi. Adunay ginatanyag ang kaaway, ang intelektuwal nga panghunahuna, tungod kay nagamaniobra ang kaaway diha sa mga intelektuwal. Ug mopahiluna ang hunahuna ug mangatarungan niini, ug moingon, “Karon, sa kadali lang. Dili ba, nga ang konseho. . .”

166 Nahinabi ko ang usa ka lalaki sa miaging adlaw, ug miingon siya, “Tan-awa, Billy!” Nagatrabaho siya sa Public Service Company, maayong tawo. Ug miingon siya, “Gusto ta ka pangutan-on sa usa ka butang,” Miingon, “Usa ka ka Irish.”

Ingon ko, “Oo, sir.” Ingon, “Medyo naulaw ako niini, pero, sa gihapon, mao ako.”

167 Ug miingon siya, “Bueno,” ingon niya, “wala ka ba kahibalo nga ikaw angay’ng, usa gyud ka Katoliko?”

168 Ingon ko, “Ako ang orihinal nga katoliko.” Kahibalo mo, ang unang Iglesia mao ang katolikong Iglesia.

169 Nakita n’yo ba kung asa na kini napaingon, karon? Misugod kini sa Pentecostes, apan gipahimutang kini sa organisasyon ngadto sa kung asa na siya napaingon karon. Tan-awa, ug nanalikod mismo ang Pentecostes ug nag-organisa, gibuhat ang butang nga gibuhat sa unang Katolikong iglesia. Ug halos pareho na sila kahalayo karon nga sama na kanila, sama sa kung

naunsa sila sulod sa duha ka libo ka tuig. Ug sa singkwenta ka tuig lang gidala sila halos ngadto na niini. Kita n'yo?

¹⁷⁰ Miingon siya, “Wala ka ba nagatoo nga pag ang usa ka grupo sa ekumenikanhong panghunahuna,” tan-awa, “magtipon-tipon ug ipangatarungan nila ang usa ka butang, ug nga magkauyonay ang tibuok nga grupo, sa tan-aw mo ba nga sila mamahimo lang nga medyo. . . Nadungog ko na ikaw nga nagawali,” miingon, “pero wala ko nagauyon kanimo.”

¹⁷¹ Ingon ko, “Ang paagi lamang nga mapamatud-an mo nga makatarunganon ang imong dili pag-uyon, mao ang mapamatud-an kini pinaagi sa Biblia.”

 Miingon siya, “Wala’y kahilambigitan niini ang Biblia.”

¹⁷² Ingon ko, “Sa imo, mahimong wala Kini kahilambigitan. Apan, kanako, ang tibuok Niini may kahilambigitan niini. Kita mo, ang Pulong Kini.”

¹⁷³ Ug miingon siya, “Wala mo ba hunahunaa nga ang usa ka pundok nga nagkahiusa nga ekumenikanhong mga panghunahuna, mas mamahimong husto, ug sigurado gyud ang pagkahusto, kaysa sa usa lang ka kabus, dili-edukadong tawo nga sama sa imong kaugalingon?” Ingon ko. . . “Bueno,” ingon niya, “unsa may labot mo sa pagsulti og unsa man nga batok nianang obis- . . . o batok sa among—among iglesia? Sa dihang, aduna na’y, niadtong maong kapanahonan, sa dihang gipahigayon nila ang unang konseho sa iglesia, sama sa gihisgotan mo na, didto usa ka gabii, nadungog namo kini, ang kapanahonan sa mga iglesia, bahin sa pagtipon-tipon sa maong ekumenikanhong konseho sa Nicaea, sa Roma, ug nga natukod ang iglesiang Romano Katoliko.” Miingon, “Wala ka ba kahibalo nga aduna kaniadto og libo ka mga kalalaken-an, sa espiritu, mga kalalaken-an nga pinadala sa Dios nga nanaglingkod niadtong konseho? Ug wala mo ba hunahunaa nga ang ilang hunahuna mamahimong mas nahibalo pa sa kabubuton sa Dios, kay sa imo dinhi, human nga napamatud-an na sa Dios sa duha na ka libo ka mga katuigan nga kana nga iglesia husto?”

¹⁷⁴ Ingon ko, “Wala gyud Siya nagpamatuud niini.” Ingon ko, “Kung kana nga iglesia usa ka Iglesia sa Dios, ipakita kanamo nga ginapamunga niini ang sama sa ginapamunga niadto sa nahaunang Iglesia. Ipakita kanamo nga ginapamunga niini ang mga butang nga ilang gihimo niadto sa sugod pa lang. Sa dihang, bisan ang Biblia nagaingon, nga, ‘Wala bisan ni usa ka kudlit ni usa ka tulpok ang mapakyas gikan Niini.’ Ug nag-ingon pa Siya, ‘Ang si kinsa man nga magataktak og usa ka Pulong gikan Niini, o magdugang og usa ka pulong ngadto Niini, ang iyang bahin pagataktakon usab,’ bisan ang ekumenikanhong konseho man o unsa pa man kini, ‘gikan sa maong Libro sa Kinabuhi.’ Impas gyud siya.”

Miingon pa, “Billy, nagkasayup-sayup ka lang.”

¹⁷⁵ Ug ingon ko, “Kung ingon-ana, siguro, usa ka higayon niadto diha sa pagkahalangdon sa Israel, sa diha nga nagkabulagbulag sila niadto sama sa nahitabo karon sa Protestante ug Katoliko, gusto sa Israel niadto nga magpabilin ingon nga Israel.” Apan ingon ko, “Makita nato nga aduna sila og usa ka hari nga ginganla’g Josafat, usa ka matarung nga tawo nga naningkamot sa pagtuman sa—sa—sa mga kasugoan sa Dios. Apan aduna sila’y usa pa didto nga ginganla’g Ahab, nga nakigminyo sa usa ka babaye, sa politika, sa pagpaningkamot nga makighigala sa usa pa ka nasud, ug nga nakigminyo sa usa sa ilang mga anak nga babaye, si Jezabel, ug gitampo kini, usab, nga kauban na sa mga katawhan sa Dios.” Mao sa gihapon ang atong ginabuhay, ug nga ginapasulod. “Ug nahimo siyang usa na ka magmamando; ginapasulti si Ahab sa *ingon niini*, ug ginapasulti si Ahab sa *ingon niana*.” Mao sa gihapon ang ilang ginapamuhay sa karon. Ug ingon ko, “Nagaabot na ang pagpakigsangka.”

¹⁷⁶ Gusto nilang hiusahon niadto ang maong duha ka iglesia, sama sa gipaninguhaan nilang buhaton sa karon. Ug—ug kang Ahab. . . Ug bisan kang Josafat, nga tawong maki-organisasyon, miingon, “Oo. Mamahimong maayo kana. Ang katawhan mo katawhan ko. Mga Cristohanon man kitang tanan. Mga magtotoo man kitang tanan. Maghiusa na kitang tanan.” Apan sa diha nga didto na siya sa maong pagpakigsangka, miingon siya, “Wala n’yo ba hunahunaa nga mag-ampo sa ta bahin niini? Angay natong konsultahon ang Ginoo.”

Ug miingon siya, “Oo,” ingon ni Ahab.

Busa miingon siya, “Sultihan ta ka kung unsa. Pangitaon nato ang propeta sa Ginoo.”

¹⁷⁷ Apan, nakita n’yo, adunay usa ka sistema niadto si Ahab nga abi niya iyaha sa Ginoo. Miingon siya, “Aduna ko’y upat ka gatus niini, nga napaeskwela ug mga binansay gayud.” Ug ginaangkon nila niadto nga mga Hebreohanong propeta sila, sama sa ginabuhay sa mga grupo sa mga ministro karon.

¹⁷⁸ Ug ila silang gidala didto, ug gipangutana kanila ang usa ka pangutana bahin sa—sa sangputan sa maong pagpakig-away. Ug nagtipon-tipon ang matag-usa kanila ug nagkahiusa, sama lang sa ginabuhay sa ekumenikanhong konseho sa karon, ug nagkaaduna sila’y tubag sa maong pangutana. “Tumungas ka. Ang Ginoo nagauban kanimo, kay kana nga yuta sa tinuod ato gayud. Ug ipapahawa ang mga Siriahanon didto, o ang mga Filistehanon. Ipapahawa sila, tungod kay ato ang maong yuta.” Medyo makatarunganon kana kaayo. Kita n’yo?

¹⁷⁹ Apan, sa gihapon, sa kinasuloran sa kasingkasing ni Josafat, mora’g dili kadto husto. Ingon niya, “Kahibalo ko nga aduna ka’y upat ka gatus ka binansay og ayo nga ekumenikanhong mga ministro dinha. Ug nagkahiusa silang tanan, hangtud nga

naghimo pa gani sila og usa ka pares nga puthaw'ng mga sungay ug nanag-ingon, 'MAO KINI ANG GINAINGON SA GINOO.' Apan mahimo bang mangita ta'g usa pa?'"

¹⁸⁰ Ingon niya, "Dili unta magsulti ang hari sa ingon," ingon sa maong pulitiko. "Dili unta magsulti ang hari sa ingon, tungod kay binansay kini nga mga kalalaken-an. Ako ang nagbansay kanila, mismo." Kana gyud. Kita n'yo? Kana gyud. "Gibansay ko kini nga mga kalalaken-an. Pero, aduna pa'y usa, apan nagadumot ako kaniya." Kita n'yo? Ang ingon, "Si Micheas kana, ang anak ni Imlah, pero," ingon pa, "Nagadumot ako kaniya. Wala na'y lain siya kondili usa siya ka masupilon kanila. Kanunay niya silang ginabadlong. Kanunay niya akong ingnan nga sayup ako. Tan-awa ugod ang akong gingharian." Oo, tan-awa kini, tan-awa kung unsa na kangil-ad kini.

¹⁸¹ Tan-awa ang inyong denominasyon, karon, "Adunay dagway sa pagkadiosnon ug ginapanghimakak man ang gahum niini." Kita n'yo? Oh, mahimong midaghan mo og usa pa ka milyon, ug nadugangan pa'g usa ka libo, ug mas samot pa ka binansay nga mga kalalaken-an, apan asa na kamo dapit diha sa Espiritu? Asa na dapit ang inyong kusog, sama niadto ni Samson, sa dihang mitindog siya didto, sama sa gihisgotan ko sa miaging adlaw? Sa daku niyang lawas didto, ug sa matag muskulo niya didto, pero wala ma'y Kinabuhi niini. Mibiya na kaniya ang Espiritu. Wala na siya'y mahimo. Ginaguyod-guyod siya niadto sa gamay nga bata; buta na ang mga mata, tungod sa usa ka babaye. Sama gayud sa iglesia, sa karon, ginaguyod-guyod na sa pulitika, sa mga obispo, sa mga elder, ug sa tanan nang ingon niana nga matang. Mga kalalaken-an nga nagahublot og mga dagami, aron aduna sila'y maibutang sa ilang kalo, ug tanan na. Asa na ba kita dapit, sa diha nga nadangtan nato kini nga punto?

¹⁸² Gipaadtoan nila ug gipasugat si Imlah, o ang . . . dili si Imlah; kondili si Micheas, ang anak nga lalaki ni Imlah. Gipaadtoan ug gipakuha siya. Ug nagpropesiya siya ug gipangsultihan sila nga mamatay si Ahab kung motungas siya didto.

¹⁸³ Ug gisagpa siya diha sa baba niadto nga arsobispo. Matinuuron lang siya bahin niadto. Miingon siya, "Asa man mipaingon ang Espiritu sa Dios sa dihang mibiya Kini kanako?"

Miingon, "Makita mo." Uh-huh. Uh-huh.

¹⁸⁴ Miingon, "Ibalhog siya sa bilangguan. Isulod siya sa bartolina. Pakan-a siya sa tinapay sa kasakit, ug tubig sa kasakit. Ug sa pagbalik na nako sa pakigdait," miingon, "Ako na ang bahala niining tawhana."

¹⁸⁵ Ug, si Imlah, nahibalo nga matarung siya sa atubangan sa Dios! Ngano man? Misubay ang iyang panan-awon sa Pulong. Usa siya ka propeta. Ug ang iyang espiritu ug iyang panan-awon eksaktong tukma sa kang propetang, Elias. Miingon siya, "Kung makabalik ka, gayud, wala ma'y gisulti ang Dios kanako."

186 Karon, ang ingon ko sa niining lalaki, “Asa ma’y husto, ang ekumenikanhong konseho kon diin nagkahiusa ang upat ka gatus nga gipiling mga kalalaken-an, nga pinili sa tawo, o ang usa ka gamay’ng pinili sa Dios nga nagasupil niini?”

“Bueno,” miingon siya, “bueno, unsaon mo man pagkahibalo sa kalainan?”

187 Ingon ko, “Balik ka sa Plano!” Unsaon man nato pagkahibalo sa pagtukod sa bilding gawas kung adunay plano?

188 Kung mihunong lang sila unta sa kadali, ug gihibalo nga kadtong propeta, nga si Elias, gitunglo na si Ahab niadto, ug miingon pa, “Pagatilaan sa mga iro ang iyang dugo.” Ug gitilaan gayud. Unsaon man niya pagpanalangin sa kung unsa’y gitunglo na sa Dios?

189 Unsaon n’yo man pagpanalangin sa bisan unsa man nga tinunglo na sa Dios? Panggawas kamo nianang butanga. Pagpahilayo kamo gikan niini. Sulod kamo kang Cristo. Amen.

190 Karon himatikdi. Pero, adunay itanyag ang kaaway. Tuyuon sa kaaway ang usa ka butang, iandam kini, ug ingnon sa intelektuwal nga panghunahuna, “Husto kana.”

191 Dinha kon diin asa na nga dapit kining bililhon nga igsoon. Kini nga tawo, miingon siya, “Medyo og... Tan-awa dinhi. Kahibalo ka, nga, kung magkahiniusang lang kitang tanan, ingon nga usa lang ka iglesia, dili ba nga mas makapaayo kanatong tanan kay sa nga nagkabahin-bahin kita sa karon?”

192 Dili ba daw sa makatarunganon kana, kung magkahiusa tanan ang mga Protestante ug mga Katoliko ug magkauyonay diha sa usa lang ka sukaranan? “Pero magakakuyog ba ang duruha gawas kung sila magakauyon?” Unsaon man ninyo pagkahimo, sa diha nga ang usa ka grupo *dinhi* wala nagatoo sa pagpang-ayo, ug *ang usa usab* moingon nga nagatoo sila, ang *laing usa* usab ginapahimutang kini ngadto sa kung unsa nga nangagi nang panahon? Ang uban wala gani nagatoo sa Biblia. Ug hiusaha kana tanan, unsa na kaha ang makuha mo? Ang Dios dili tigpasiugda og kasamok.

193 Sa wala pa niadto mapahimutang sa Dios ang Iyang Iglesia diha sa kahan-ayan, nanaghulat sila niadto og napulo ka adlaw ug gabii, hangtud silang tanan nangahimong “atua sa usa ka dapit, nagkahiniusang.” Ug didto miabot ang Balaang Espiritu alang sa pagpanguna, dili nga sa kung unsang ekumenikanhong konseho. Kita n’yo? Nagalaum ako nga nakuha ninyo kini. Himatikdi.

194 Ang dili-magtotoo kana, nga dili matinud-anon sa Pulong sa Dios, nga wala ginatamud kung unsa ang ginaingon sa Pulong, apan ang ginatamud niya ang kinaugalingon ninyong mga pagpangatarungan. Mao kana ang gibuhat kaniadto ni Eva, sa sugod pa lang. Misalig siya diha sa iyang pagpangatarungan.

¹⁹⁵ Miingon si Satanas, “Karon, ania tan-awa. Dili ba makatarunganon kini? Kahibalo ko nga *Kana* ang ginasulti sa Pulong. Pero, kadyut lang, dili ba makatarunganon kini nga—nga mas maayo kanimo kung nahibalo ka sa sayup og husto?”

“Aba, oo.” Dayon gidawat niya kini. Mao gyud.

¹⁹⁶ Ingon niana gayud sa pagpangatarungan. Karon, ang kawalay-pagtoo nagapaingon kanunay sa pagpangatarungan, apan ang pagtoo dili gayud motandog niini.

¹⁹⁷ Dili ba niadto makatarunganon sa atong amahan; siya nga mao ang amahan sa atong pagtoo, si Abraham, nga kita iyang mga kaanakan pinaagi “diha kang Cristo.” Dili ba niadto makatarunganon nga ang usa ka babaye saysenta’y singko na ang katigulangon, ug kauban niyang nagkinabuhi, sukad pa kini nga bata pa, dili gayud makaanak? Ug sa diha nga usa na ka gatus ka tuig ang katigulangon niini, o nobenta, ug siya nga usa na ka gatus ka tuig niadto, ug wala pa gihapon anak. Dili ba sa pagpangatarungan, pipila na ka staff sa mga doktor ug siyensya ang misusi na kang Sarah? Nanag-ingon, “Aba, nag-uga na ang iyang tagoangkan. Nag-uga na ang agianan sa iyang gatas, kuwarenta na ka tuig ang milabay. Ang iyang kasingkasing, sa nianang edad, dili na niya kaya ang magbati sa pagpanganak.” Aba, mga pagpangatarungan lang kana.

¹⁹⁸ Apan gisalikway kadto ni Abraham. “Wala siya nagduhaduha sa saad sa Dios, tungod sa kakulang sa pagtoo. Batok sa mga pagpangatarungan, wala niya giduhaduhaan ang saad sa Dios, bisan pa kon unsa pa kadto. Kay iyang—giisip niya nga arang tumanon sa Dios ang tanan-tanan nga giingon Niyang pagabuhaton Niya.”

¹⁹⁹ Karon, asa na ang mga kaanakan ni Abraham niining buntaga? Kamong mga ministro nga nahadlok, nangahadlok kamo, tungod sa inyong mga tinapay ug tubig, og nga maanaa na dinha sa kadalanan, kung biyaan n’yo kanang Babilonia. Asa na ang inyong pagtoo? Nag-ingon niadto si David, “Bata pa ako kaniadto, ug karon ako tigulang na. Wala pa gyud ko’y nakita nga matarung nga gibiyaan, o ang Iyang Binhi nga nagpakilimos og tinapay.” Ayaw kahadlok. Pabilin lang nga magmatinuuron kang Cristo.

²⁰⁰ Apan ang kakulang-sa-pagtoo modangup gayud sa pagpangatarungan. Ingon niana ang gibuhat niini. Karon nakuha n’yo ba kini? Nagasalig ang pagkakulang-sa-pagtoo diha sa mga pagpangatarungan, sa mga butang nga iyaha sa karon. Dili kini buhaton sa pagtoo.

²⁰¹ Nagatan-aw ang pagtoo diha sa Pulong. Apan ginapahimutang sa pagtoo ang kaugalingon niini diha sa dili-matarog nga Bato, ang Walay-Katapusan nga Pulong sa Dios. Amen. Wala nagatan-aw ang pagtoo sa pagpangatarungan. Dili ko igsapayan kung unsaon mo pa pagpakita nga mas maayo kini.

Kung ang ginaingon sa Pulong “dili,” saligan kana sa pagtoo. Mao kana ang santuwaryo nga dapit-pahulayan sa pagtoo.

²⁰² Gusto kong pangutan-on kamong mga Lutheran, niining buntaga, kamong mga Baptist, ug kamong mga Katoliko, ug kamo, kung unsa man mo, kamong mga tawo sa denominasyon sa tibuok kalibutan. Unsaon man ninyo sa pagpahimutang sa inyong pagtoo diha sa inyong denominasyon, sa dihang supak man kini sa Pulong? Unsa man nga matang sa pagtoo ang aduna kamo? Gahum sa pagpangatarungan ang anaa kaninyo, ug dili ang pagtoo. “Kay ang pagtoo nagagikan sa pagpatalinghug,” sa pagpatalinghug ba sa ekumenikahong konseho? Mahimo ba gayud n’yong . . . Ang ingon, mahimong makuha n’yo kana sa Old Ladies Birthday Almanac, apan dili gayud ninyo makita kini sa Pulong sa Dios.

²⁰³ “Ang pagtoo nagagikan sa pagpatalinghug, ug ang pagpatalinghug sa Pulong sa Dios.” Amen. Sultihi raw ko nga ang usa ka tawo makasulti og bisan unsa man nga supak Niana, ug ingnon nga kini ang Pulong sa Dios. Sa dihang, “Mangahanaw ang mga langit ug yuta, apan kana nga Pulong dili gayud.”

²⁰⁴ Nakaplagan sa pagtoo nga ang Pulong mao ang iyang santuwaryo sa kapahulayan. Nagasaka kini mismo ibabaw nianang Batong Walay-Katapusan, si Cristo Jesus, ang Pulong, ug nagapahiluna kini didto ug nagapahulay. Modaguhong man ang mga hangin. Manghaguros man ang unus. Luwas siya, hangtud sa kahangturan. Nagapahulay siya mismo dinha nianang Pulong. Dinha kon diin ang pagtoo, ang tinuod nga Cristohanong pagtoo, nagapahulay. Ang dapit nga pahulayan mao ang Pulong, kay nasayod kini nga kanunay gayud pagapamatud-an sa Dios ang Iyang Kaugalingon ingon nga labing labaw, kaysa sa tanan Niyang mga kaaway. Bisan kung unsa pa kini ka daw sa dili-maayo kon tan-awon, ug kung unsa nga nakasulod na ang kaaway, ug kung unsa nga medyo daw sa nalupig ka na, sa gihapon nahibalo ang pagtoo.

²⁰⁵ Karon, kaninyong mga masakiton, oh, daw sa unsa ko ka gusto nga mahipaklaro gayud kini og ayo! Pagnaangkon n’yo kana nga pagtoo, nga mamaayo na gayud ka; ang tanan—tanang kahimtang, tanan nang uban pa, tanan nang mga timailhan, tanan nang mga sintoma mahimong mopakita nga himalasyon ka na, dili ka na gayud matarog! Anaa sa Pulong sa Dios ang iyang santuwaryo nga dapit-pahulayan, sa diha nga ang pagtoo, ang tinuod nga pagtoo ginapahiluna na dinha ang kaugalingon niini. Dili nga patoo-too lang ha; pagtoo gyud. Dili nga paglaum; kondili ang pagtoo. Anaa *diri* sa gawas ang paglaum, nga nagalaum nga nakasulod na unta kini. Ang pagtoo anaa na sa sulod, nga nakalantaw sa gawas, ug nagaingon, “Nahimo na.” Kita n’yo? Kana ang pagtoo. Dinha ang ginapili sa pagtoo ang iyang dapit-pahulayan, kay nasayod kini nga dili gayud, dili

gayud pahanugotan sa Dios nga daugon kini sa kaaway. Wala gayud Siya sukad nagpahanugot. Nasayod niana ang pagtoo, mao nga, bisan unsa pa ang kahimtang sa maong butang.

Nasayod si Noe nga maglutaw gayud kadto nga arka. Kita n'yo? Milutaw gayud.

Nasayod si Daniel nga mahimong isarado sa Dios ang baba sa maong mga liyon.

Nasayod kadtong mga batang Hebreohanon nga mahimong palungon sa Dios ang maong kalayo.

²⁰⁶ Nasayod si Jesus nga pagabanhawon Siya sa Dios, tungod kay nag-ingon na ang Pulong, “Dili Ko pagabiyaan ang Iyang kalag sa sheol, ni nga motugot Ko nga ang Akong Balaan makakita sa pagkadunot.” Nasayod Siya nga mosugod na ang pagkadunot inig setenta’y dos na ka oras. Nag-ingon Siya, “Sulod sa tulo ka adlaw mabanhaw Ako.” Kita n'yo? Gipili niini ang santuwaryo sa Pulong sa Dios ingon nga iyang Walay-Katapusang dapit-pahulayan, ug atua kini nagpabilin.

²⁰⁷ Paninguhaon sa pagpangatarungan ang tanang mahimo niini nga maila nga, “Bueno, *kini* nga sistema sigurado nga mamahimong mas maayo pa. Mao na *kini* Kana.” Mas maayo kini kon tan-awon tungod kay nagalantaw ka nga gamit ang intelektuwal nga panghunahuna. Mahimo mong pamatud-an ang mga pagpangatarungan.

²⁰⁸ Apan dili mo mahimong pamatud-an ang pagtoo. Kay, kung mahimo mong pamatud-an kini, dili na kini pagtoo. Apan ang nailhan lang sa pagtoo mao ang Pulong ug ang saad, ug ginalantaw niini ang kanang butang nga dili mo makita. “Ang pagtoo mao ang pagsalig kanato sa mga butang nga atong ginapaabot, ang panghimatuod sa pagkaanaa sa mga butang nga dili makita.” Dili mo madala sa pangatarungan. Dili ko mahimong pamatud-an kung unsaon kini sa paghimo. Wala ko kahibalo kung unsaon kini sa paghimo. Wala ko mahibalo niini, apan ginatoohan ko kini. Nahibalo ako nga mamaingon niana kini, tungod kay mao man ang giingon sa Dios. Mao na kana.

²⁰⁹ Mao kana ang hinungdan nga nahibalo ako nga husto Kini. Nasayod ako nga husto ang Pulong. Nasayod ako nga husto ang Mensahe, kay anaa Kini sa Pulong. Ug nakita ko ang buhing Dios nga nagalihok sa taliwala Niini, aron sa pagpamatuod. Ania na kita sa usa ka exodo, tinuod gayud.

²¹⁰ Bisan ang kamatayon mismo dili makapatarug sa pagtoo. Mangtindog ang mga tawo mismo sa kamatayon, diha sa . . . mismo sa atubang sa kamatayon, ug ginasinggit pa ang kadaugan sa pagkabanhaw. Kang Pablo pa, “Oh kamatayon, hain na ang imong ikot? Lubnganan, hain na ang imong kadaugan?” Kita n'yo? “Tungod kay, nabanhaw si Cristo, ug kadtong mga anaa na kang Cristo mangbangon uban Kaniya

diha sa Iyang Pag-abot.” Kita n’yo? Dili kini mahimong mausab. Oo.

²¹¹ Ginahimo sa pagtoo ang Pulong sa Dios ingon nga iyahang santuwaryo sa iyahang Walay-Katapusang pahulayan. Nagapahiluna kini diha sa Pulong sa Dios. Himatikdi, pag-usab.

²¹² Karon, aduna pa kita’y gamay nga oras, mga baynte-singko minutos pa, kung kamo—kung okey lang kaninyo. [Nagaingon ang kongregasyon, “Amen.”—Ed.] Ako—gusto kong ipadayon kini nga teyp, sa makadiyut na lang.

²¹³ Himatikdi ang maong hari, kadtong bag-ong hari nga mitungha, nga wala nakaila kang Joseph. Unsa man niadto ang una niyang plano, ang pagguba ba sa gahum sa Israel? Ang pagpapas sa ilang mga anak. Husto ba kana? [Nagaingon ang kongregasyon, “Amen.”—Ed.] Gipaningkamotan niya niadto nga papason ang ilang mga anak. Karon paminaw og maayo. Ang mao ra nga Yawa, diha sa usa ka laing porma sa pagkahari, ginapaninguhaan nga patyon ang maong bugtong nga Anak sa Dios. Kita n’yo? “Pamatya ang mga bata, usa, sa dili pa sila makasugod.” Ang Yawa tinuod gyud ka maantigo, klase nga maliputon gayud. Nahibalo siya kung unsaon pagpakgang sa butang sa dili pa kini makasugod. Nahibalo siya niini. Kita n’yo?

²¹⁴ Ug ang bugtong butang nga mahimo mong buhaton gayud, aron malupig siya, mao ang pagsalig diha kang Cristo, ug ipaubos ang imong kaugalingon ug tugoti Siyang pangunahan ka. Kita n’yo? Dili mo gayud mahimo kini sa bisan unsa pa nga laing paagi. Ang intelektuwal mong mga gahum dili gayud makahimo niini. Gikinahanglan mong toohan kini. Pagsalig lang diha Kaniya. Siya ang maong Magbalantay. Dili kini buluhaton sa carnero nga abogon ang lobo palayo. Buluhaton kini sa magbalantay. Apan gikinahanglan nga magpabilin ang carnero nga kauban sa magbalantay, aron padayon nga luwas. Kana ang dapit nga luwas ako, ang maanaa kang Cristo; ug si Cristo mao ang Pulong. Mao kana ang luwas nga dapit.

²¹⁵ Himatikdi. Ang Yawa, diha sa porma ni—ni Raamses, nga usa ka hari, ang unang butang nga iyang gihimo mao ang pagpamatay sa maong mga anak, pinaagi sa usa ka natural nga kamatayon. Ug dihadhiha nga natawo ang Anak sa Dios. . . Mibalhin na siya gikan sa Egipto, kay gilaglag man niadto sa Dios ang Egipto, gitunglo kini. Wala na gayud kini nakabalik pa, sukad-sukad. Dayon atua na siya sa Roma; gibalhin niadto ni Satanas ang iyang—ang iyang lingkuranan ngadto sa Roma. Ug ang unang butang niadto nga gihimo sa Roma, aron nga papason kini tanan, aron makuha gayud, nga masigurado; ang Yawa, didto niadtong sistemang Romano, gipanguhaan nga patyon (ang unsa?) ang Anak sa Dios, sa sugod pa lang. Ang mao ra nga Yawa!

216 Ug, sa karong panahon, gibuhat niya ang mao ra gihapon, ilalum karon sa ilhanan sa espiritu, nga relihiyoso, nagapamahayag og Cristianismo, ug ginapanguha ang atong mga dalaga ug gipakasal sila sa Katolikong mga batan-ong lalaki, ug ginapahimo kanila nga ipadaku ang ilang mga anak nga mga Katoliko, aron nga bungkagon ang gahum sa pikas. Kana ang inyong demonyo. Kana ang inyong Yawa nga naglingkod sa pito ka bungtod, nga nakasul-ob og tagutlo ka purongpurong, nga maliputon ug malimbungon, maantigo, intelektuwal kaayo nga sama gayud sa serpente; binhi sa serpente, iyang mga anak, nga migamit og mao rang mga intelektuwal nga pamaagi. Tan-awa.

217 Dayon ilang ginapamatay ang mga bata, diha sa duha ka mga higayon. Pinaagi sa unsa ba nila ginapamatay ang mga bata? Duha niadto ka higayon. Karon hinumdumi, timan-i kanang duha, ug kining ikatulo. Kita n'yo? Iyang ginapamatay ang mga bata, sa unang duha ka higayon, pinaagi og natural nga kamatayon. Ug sa niining ulahing higayon, ginadala niya ang mga bata ug ginapamatay sila pinaagi og espirituhanon nga kamatayon, sa pagkasal, sa pagminyoy.

218 Dili ba mao sa gihapon ang ginaingon niadto ni Daniel, sa niining gingharian sa puthaw ug yutang kolonon, nga ipang sagol-sagol nila kini nga mga binhi, sa pagpaninguha aron mabungkag ang gahum sa usa pa ka katawhan? Ug mao kana ang ilang ginabuhat, hangtud nga nagmalampuson sila karon sa maong butang. May nahipasulod na sila nga presidente. Karon, ang sunod nga butang nga kinahanglan ninyo buhaton, mao ang pagpasulod—ang pagpasulod na sa cardinal. Ipasulod na ang maong tibuok gabinete, ug dayon unsa na'y inyong buhaton?

219 Ang sunod butang nga ilang buhaton, kuhaon nila ang ilang kuwarta ug—ug bayaran ang utang sa Estados Unidos, ug ginahulam kini gikan sa simbahan, ug dayon nabaligya na kamo. Karon, kita—nagkinabuhi kita karon, nga ginabayaran ang atong utang sa ubang nasud didto, nga gamit ang kuwarta sa buhis nga dili pa makolekta gawas kung milagpas na ang kuwarenta ka tuig. Wala na kita'y kuwarta. Apan aduna niini ang simbahan. Dili ba nagaingon man ang Biblia, “Dinayandayanan siya og bulawan”? Ug, oh, sus! Pero inyong. . .

220 Ingon niana ang ginabuhat niini, kita n'yo, ginapakasal ang inyong mga anak nga babaye, mga anak nilang babaye usab nga ginapakaslan ang inyong mga anak nga lalaki, ginapadaku ang mga anak nga Katoliko, mao gyud, ginapatay sila pinaagi sa espirituwal nga kamatayon. Dili ba giingon sa Biblia, nga, “Iya siyang ibundak diha sa usa ka higdaanan sa pagkakalibutanon, ug nga patyon ang iyang mga anak pinaagi sa espirituwal nga kamatayon”? Pinadayag 17. Kita n'yo?

221 Kini kanunay ang Pulong. Dili ko igsapayan kung asa man kamo moadto, kini ang Pulong sa gihapon. Kinahanglan motakdo kini mismo diha sa maong pagkahulagway. Kung dili gani, dili kini ang Pulong, dili kini ang Pulong. Kung dili ninyo kini dire-diretso mahitakdo sa tibuok Biblia, sayup kini kung ingon-ana.

222 Tan-awa. Sulod niining panahona, ginabansay sa Dios ang alagad Niini alang sa buluhaton niya. Ginabansay siya niadto, nga dili nila makita, nga dili nahilangkub sa ilang mga plano, sa ilang mga pamaagi. Nakuha n'yo ba kini? Gawas sa ilang mga sistema pang-organisasyon, ginabansay niadto sa Dios ang usa ka tawo alang sa Iyang katuyoan. Gitugotan Niyang magpadayon lang kadto. Gitugotan Niya siyang magminyo, nga magkaaduna og asawa ug mga anak, anak nga si Gershom. Nagkinabuhi siya niadto og maayong panginabuhi, nga ginapanalanginan siya didto. Apan, sa tibuok niadtong panahon, Iya siyang ginapahiandam na niadto, ginabansay na siya.

223 Ang Dios ug ang Iyang kaaway ingon niana ang gibuhay, kaniadto diha sa natural, maingon sa ginabuhay sa Dios ug sa Iyang kaaway karon diha sa espirituwal. Ila silang gipamatay kaniadto pinaagi og natural nga kamatayon; karon pinaagi na sa espirituwal nga kamatayon. Kita n'yo? Ginapahiandam na niadto sa Dios ang usa ka tawo, ang Iyang propeta, aron sa pag-adto sa Egipto. Ug si Satanas usab ginapahiandam na niadto ang usa ka Raamses, ang iyang tawo diha sa natural, kita n'yo, ginapahiandam ang maong tawong natural (sa unsa?) aron sa pagpamatay, o aron hiusahon na ang tanan nga mga Egiptohanon ug Hebreohanon, sa pag-alagad kaniya sa gihapon.

224 Mao kana kon ngano nga malisud kaayo alang sa hunahuna nga mangatarungan batok sa usa ka sistema pang-edukasyon nga mahimong pamatud-an niini ang punto niini. Kita n'yo? Husto kana. Ang iyang hunahuna kanunay gayud nga modangup sa edukasyon. Dili man lang makita Kini sa mga intelektuwal ug sa hunahuna nga nagapangatarungan.

225 Natan-aw n'yo na ba ang *Ten Commandments* ni Cecil DeMille? Siguro daghan na kaninyo ang nakakita na. Wala ako nagauyon sa pagsulod sa mga sinehan, sa tanan niining mga butanga. Apan ginarekomenda ko sa iglesia, kang kinsa man, kung wala sila'y ipasalida didto nga uban pa gawas niana, sa gustong motan-aw niini, okey lang kini kung gusto nilang motan-aw niini. Tungod kay, dili ko gayud tugotan nga . . . Una, nangadto ang uban sa akong mga kaigsoonan. Nangadto sila, giingon nila kanako. Dugay na nga mga katuigan nga wala gyud ako nakaadto sa ni usa. Sa ulahi, miadto ako dinhi dapit, sa dihang atua pa kini niining drive-in. Gitan-aw ko kini. Natan-awan ko kung unsa kadto. Dayon giingnan ko ang iglesia, "Kung

gusto n'yo moadto aron tan-awon kana, okey lang.” Atua kini. Pagkamaanindot kadto, pagkatahum.

226 Kung unsa kadtong panglimbong sa Yawa, kung unsa siya didto ka maliputon, kung giunsa niya—giunsa niya didto pagpamuhat aron patyon kadtong mga bata. Ug kung giunsa pagdawat kadto sa intelektuwal nga panghunahuna ug nga gitooan kini, tungod kay makita nila kadto! Makatarunganon man kadto. Oh, kung giunsa sa Dios, sa tanan niadtong panahon, nga ginabansay kaniadto kining Iyang propeta! Ug kung giunsa nga ginabansay niadto sa Egipto, diha sa pulitika, kining si Raamses, aron nga mohari na! Ug dayon miabot ang dakung pagpakigsangka, usa niadto ka adlaw, tali sa intelektuwal ug espirituwal nga gahum. Ug si Raamses niadto, uban sa tanan niyang mga diosdios, nagatindog didto ug nagabubo og tubig, aron—aron pahimut-an ang dios sa Nile. Gihampak siya sa Dios, ug nanglagsik ang dugo gikan kaniya. Iya niadtong . . . Oh, ako—nahunahunaan kong makapaalinggat gayud kadto, kita n'yo, ang makita kung unsa ang nahitabo. Oh!

227 Karon himatikdi. Kanunay nga mopaingon sa pagpangatarungan ang intelektuwal. Ug dili makita niini ang espirituhanon nga bahin, tungod kay intelektuwal kini. Oh, ni makita man kini sa bisan unsa mang panahon! Dili nila makita kini sa karon.

228 Dili nila makita kini niadtong panahon ni Elias. Unsaon man pagkahimo niining usa ka tigulang na nga propetang dili madrowing ang nawong. . .

Pasayloon unta ako sa Dios sa pagsulti og butang nga sama niana. Apan akong—nasipyat ko'g paghimong. . . Ug nasayod ang Dios nga ginapaninguhaan ko lang nga himoon—hmoon kini nga ingon ka walay-katarungan nga mahimo ko, aron nga inyong makita ang—ang Espiritu sa Dios.

229 Sama sa giingon na ni Pablo, “Wala gayud ako mianha kaninyo, nga nagasulti pinaagi sa makabibihag nga kaigmat sa mga pulong ug kaalam, kay mopaling gayud ang inyong mga hunahuna ngadto sa kaalam. Apan mianha ako pinaagi sa gahum sa Balaang Espiritu, aron nga ang inyong—nga ang inyong—ang inyong—ang inyong paglaum ug pagsalig magasandig, dili sa kaalam sa tawo, kondili sa gahum sa pagkabanhaw ni Jesus Cristo.”

230 Mao kana kon ngano nga ginahimo ko kini nga ingon ka walay-katarungan, diha sa pagtawag sa Kahalangdon, diosnong propeta, “nga may nawong nga dili madrowing.” Tungod kay, mahimong usa siya niadto ka—ka pagkamaot ang hitsura, kung matindog diha, tupad sa usa ka nakabisti'g maayo nga pari, ug tawong ang kaugalingon niya nga usa ka tawo sa Dios.

231 Tan-awa siya. Mahimo n'yong makita ang pagkabalaan sa maong pari, diha sa panghunahunang intelektuwal. Makita

n'yo ang maong turbante diha sa iyang ulo, ug ang binaliskad nga... ug ang ephod nga nakalaylay sa iyang dughan *dinhi*. Makita n'yo ang lana nga igdidihog, nga natural, diha sa iyang bungot, nagatulo hangtud sa sidsid sa iyang saput. Makita n'yo ang nagadilaab nga kalayo sa hinalad, ug ang tanang mga seremonyas diha sa kahan-ayan. Karon, mahimong dinha gayud mopaingon ang natural nga panghunahuna.

²³² Ingon niana ang ginapaninguhaan nilang buhaton sa karon, ang mata, ang ganghaan nga paingon ngadto sa kalag. Pero, nakita n'yo, anaa sa likod niana nga mata ang espirituhanong mata!

²³³ Gitan-aw nila kining tigulang na og dili-madrowing nga hitsura sa lalaki nga atua didto, mabalhibo ang iyang dughan; ug usa ka бага, dakung bahin sa panit sa carnero ang nakaputos kaniya, nga gama gikan sa panit, ang bakus nga nakapalibot sa iyang hawak, nga, tingali nakatiniil pa, maniwang ug nagkunot na nga mga bukton, mga panit nga nangyatyat na paingon *niini*; ug giuban na, nga bungot nga nanggibitay sa tibuk niyang nawong; ug nga naggunit pa og baliko nga sungkod, nga nagatindog didto. Pero makita sa espirituhanong mata ang gahum sa Dios nga nagapanglihok dinha, kay eksaktong nakasubay kadto sa Pulong. Dili nga kung unsa ang makita sa alimpatakan; kondili unsa ang makita sa espirituhanong mata!

²³⁴ Ug ang—ang natural nga mata, sa karon, makita ang mabihagong simbahan, ang pagpakig-fellowship sa mayor sa siyudad, o—o sa kung unsa pa, diha niining organisasyon sa mga denominasyon. Ug napakyas sila nga makita ang gahum sa Balaang Espiritu, sa diha nga mahimong banhawon Niini ang mga patay ug ayohing ang mga masakiton. Ug—ug—ug kung giunsa... Kita n'yo? Sila, ginatan-aw nila, ug ginatan-aw nila ang Hollywood, ug ginatan-aw nila ang mga tawo diha sa dalan.

²³⁵ Ang mga kababayen-an, sa karon, ginahunahuna, “Bueno, *kining* babaye, nga si Susie, miyembro na gani siya iglesia. Gipaputol man niya ang iyang buhok. Nagapang meyk-ap man siya. Nagustohan man siya sa mga tawo sa iyang lugar.”

²³⁶ Unsa na kaha ang Langit? Kita n'yo? Pag-supak kini sa Pulong, dili mahimo kining suportahan sa Dios. Iyang, mamahimo kini nga ginasuportahan Niya ang batok Kaniya Mismo. Mamahimo kining ginasalikway Niya ang Kaugalingon Niyang Pulong. Ug aron mahibaloan n'yo, dili gayud kana pagabuhaton sa Dios, bisan pa nga mangahanaw man ang mga langit ug yuta. Tinunglo ang usa ka babaye nga pinutlan ang buhok, sa atubangan sa Dios, o ang babaye nga magsul-ob og bisti nga iya sa lalaki. Kita n'yo? Masabtan Kini sa espirituhanong mata; nagakinabuhi sila alang sa Laing Kinabuhi. Ang natural nga panghunahuna nagakinabuhi aron

ipangatarungan ang karnal nga mga butang nga iya sa karong panahon.

²³⁷ Himatikdi karon, ginabuhat kini sa Dios, ug sa gihapon wala nasayod ang mga tawo niini. Nakadapig man ang karnal nga panghunahuna sa mga pagpangatarungan. Nagapanawag na ang Dios og usa ka espirituhanong exodo. Kon diin nga mitawag Siya niadto og usa ka natural nga exodo alang sa Iyang katawhan, nagapanawag Siya karon og usa ka espirituhanong exodo, sa (Iyang mga unsa?) Iyang mga Pinili, alang lang ngadto sa Iyang mga Pinili.

²³⁸ Karon, dili makita niadto sa Egipto nga husto ang Israel, bisan pa nga ang dugo sa carnero nakapahid na didto sa pultahan ug sa balabag niini, ug ang mga butang nga nagakahitabo na niadto.

²³⁹ Ug ang Dios didto, nagapanglihok sa niining propeta, ug nga ginapanghimatud-an ang pulong sa usa ka tawo. Ipatindog siya didto, ug gamiton ang usa—usa ka sungkod nga iya niadtong ginasandigan, ug ituy-od paingon sa sidlakan, ug moingon, “Magkaaduna og mga langaw, ug nga molukop sa mga Egiptohanon.” Milakaw na pabalik didto.

Ug ang tanan na nanag-ingon, “Wala ma’y nahitabo. Wala’y nahitabo.”

²⁴⁰ Apan pagkataudtaod, may usa ka berdeng langaw nga patuyok na nga naglupad-lupad. Wala magdugay, tingali mga duha na sila ka libra kada yarda kuwadrado, nga gisulti lang sa usa ka tawo ngadto sa pagkatungha.

²⁴¹ Atua didto nagatindog ang usa ka intelektuwal nga Raamses, nga ginabatokan kadto; usa ka relihiyoso kaayong tawo, ug nga ginabatokan ang Espiritu sa buhing Dios. Ug ang makita sa natural nga panghunahuna mao si Raamses lang. Apan makita sa espirituhanong panghunahuna ang saad, ug nakita kini nga nagakatuman.

²⁴² Bueno, kung mahimo niadto ni Josue ug Caleb nga isipon kadtong mga Amalekanhon, ug mga Hebehanon, ug mga Jebusehanon, sama nga daw wala sila didto, bisan pa nga doble, o tulo o upat ka pilo ang kadaghanon sa mga niini kanila. Ug ang natural nga panghunahuna, didto sa Cades-barnea, sa diha nga naadtoan na kadto sa mga espiya, nanag-ingon, “Oy, dili nato kini masarangan. Kita. . .Sila’y—pagkadagku kaayo nila. Bueno, sama lang kita—sama lang kita sa mga dulon, sa tupad nila.”

²⁴³ Apan nakita ni Caleb ug ni Josue ang saad sa Dios, miingon, “Sobra-sobra ang kasarang nato sa paghimo niini.” Ngano man? Ginatan-aw nila kaniadto, “Ang giingon sa Dios, ‘Ginahatag Ko kaninyo ang maong yuta.’” Kita n’yo? Dili kini makuha sa karnal nga panghunahuna. Makuha kini sa espirituhanong panghunahuna.

²⁴⁴ Ug ngano man? Gusto kong pangutan-on kamo og usa ka butang. Nganong wala man nakita kining mga butanga sa mga Egiptohanon? Tungod kay dili sila mga pinili. Giingnan na sa Dios si Abraham sa wala pa kadto nahitabo. Sabta n'yo kini, kamong nahikatulog nga iglesia! Giingnan na sa Dios si Abraham sa wala pa kadto nahitabo. "Ang imong kaliwatan mamahimong dumuloong didto sa—sa Egipto, sulod sa upat ka gatus ka tuig, ug Akò sila ipahigawas." Mao kana ang hinungdan nga nakita nila kini, tungod kay pinili sila nga makita kini. Sila ang mga gipangpili. Pinili ang Israel aron nga makita ang mao nga ilhanan sa Dios, ug nanggawas sila sa Egipto kon diin nangalaglag usab ang mga dili-magtotoo.

²⁴⁵ Ug, sa karong panahon, ginapanawag na sa Dios ang Iyang mga Pinili, ang espirituwal nga Binhi ni Abraham, pinaagi sa pagtoo nga aduna kaniya niadto sa Pulong sa Dios. Dili ba ninyo makita ang espirituwal nga Binhi, niining panahona? [Nagaingon ang kongregasyon, "Amen."—Ed.] Dili Niini makita ang iglesiang intelektuwal. Pulong ang makita Niini. Ug Kini ginapanawag na gikan nianang dagkung mga denominasyon, paadto sa Presensiya ni Jesus Cristo. Klaro ba kana? Nakuha n'yo ba kini? ["Amen."] Sige. Padayonon pa nato. Ang mga Pinili, lamang!

Sila Doktor D.L.Ph., dili gayud nila makita Kini. Dili man sila pinili.

²⁴⁶ Ug, hinumdumi, kining pagpili, nagaabot na karon, dili lang nga paadto sa usa na usab ka nasud. Padulong kini ngadto sa Kahimayaan, kon diin nga ang ilang mga ngalan nasulat na didto sa Libro sa Kinabuhi sa Cordero. Dili nga ilalum sa natural, sa luoy'ng mananap nga carnero nga nagpahigawas niadto sa Israel, nga mahimo pa silang manalikod gikan didto ug mangbalik sa naandan. Apan, dili kana mahimo sa niini. Ilalum na kini sa Dugo sa Cordero sa Dios nga gipatay sa wala pa ang pagkatukod sa kalibutan. Ug nahisulat na ang ilang mga ngalan diha sa Libro sa Kinabuhi sa Cordero sa wala pa ang pagkatukod sa kalibutan. Ug nahisulat sila dinha, nga pinili na. Ug pagkasidlak niana nga Kahayag diha kanila, nga ingon niana, mangatumpag kining mga paril sa denominasyon palayo kanila, ug ania na sila. "Panggula kamo gikan sa ilang taliwala," ang ingon sa Balaang Espiritu sa ulahi niining mga adlaw. "Ayaw paghikap sa ilang mahugaw nga mga butang. Ako'y mamahimong Dios ninyo; kamo'y mamahimong mga anak nga lalaki ug anak nga babaye Kanako." Karon, himatikdi.

²⁴⁷ Nagabantay niadto ang Israel. Nasayod sila nga ang Dios nagapakighinabi sa Iyang mga propeta. Sila . . . kanila nagaabot ang Pulong, ug nanganha sila aron makita Kini. Ug nakita nila Kini.

248 Ug karon sa intelektuwal nga ilhanan, makita nato kini sa karon, nga nanagpanoo sila sa ilahang mga organisasyon. Anaa pa sila sa gihapon sa ilang mga kredo. Bisan pa nga sila . . .

249 Sama lang kaniadto kang Balaam, nga misaka didto sa itaas sa bungtod, kon diin nga atua ang Israel. Didto ang Israel, dili nga usa ka nasud, usa lang kadto ka nagsige'g panaw nga katawhan, ug nga masalaypon. Ug ang Moab, nga igsoon niya, ang intelektuwal, ang tawong organizado, misaka didto sa itaas sa bungtod, nga uban ang obispo o ang propeta nga aduna sila, ug nagtukod og altar, ug naghalad og mao rang halad. Apan napakyas siya nga makita ang Haligi nga Kalayo ug ang hinampak nga Bato nga atua taliwala sa Israel.

250 Mao usab kini sa karon nga panahon. Nagatan-aw ang intelektuwal nga panghunahuna ngadto sa mga bantugang tawo nga atua didto. Napakyas sila nga makita ang hinampak nga Bato. Bisan pa ang maong obispo, mismo, napakyas nga makita ang gahum sa Balaang Espiritu, ang singgit sa Hari diha sa maong kampo. Nangapakyas sila nga makita kini.

251 Mao nga, ingon niana na usab kini sa karong panahon. Ginatawag na sa Dios ang Iyang mga tawong pinili, ug karon mga pinili sila. Ug karon mga pinili sila alang man sa unsa? Alang sa usa ka pagkabanhaw. Ug unsa man nga matang sa ilhanan ang ginapakita Niya kanila? Ang ilhanan sa pagkabanhaw.

252 Unsa man ang ginapakita Niya kanila kaniadto? Usa ka ilhanan sa pagluwas, aron luwason sila gikan sa pagkaulipon, usa ka ilhanan sa gahum nga makahimo sa pagsira sa kalangitan o nga mapangitngit ang kawanangan.

253 Ug Iya karon ginapakita ang gahum sa pagkabanhaw sa Iyang Anak nga buhi sa taliwala kanila, aron banhawon sila gikan niining lubnganan ug menteryo nga gikapuy-an nato, ngadto sa maong Yuta nga gisaad na Niya kanato. Ilhanan sa pagkabanhaw, ang pagpanawag pagawas sa espirituwal nga Egipto ug sa espirituwal nga Babilonia, nahibalo ako.

254 Tugoti kong isulti kini nga mahinay-hinay, aron nga inyong makuha kini. Ang pagbuhat niini pinaagi sa mao rang pamaagi nga pagbuhat Niya niini kaniadto sa sinugdanan, mao ra gihapon sa karon ang Iyang ginabuhat. Ang pagbuta sa mga mata sa dili-magtotoo; pag-abli usab sa mga mata sa magtotoo. Ug himatikdi nga ginabuhat kini sa pulitika diha sa pang-intelektuwal nga bahin, ang pulitika ug ang simbahan, ang pulitika ug ang mga nasud, tanan na; ug nahitago kanila ang maong pikas nga bahin, sa usa ka espirituhanong katuyoan.

255 Gidala sa Dios ang usa ka tawo didto sa kamingawan, gibansay kini didto. Ug gibalik siya, ug gipadumala kaniya ang maong butang, ug gipahigawas ang katawhan. Nakita n'yo ba kung unsay akong pasabot? Dili Niya mahimong usabon ang

Iyang programa. Dios Siya. Dili gayud Siya makigtigayon sa usa ka grupo. Wala gayud Niya sukad buhata. Nagapakigtigayon Siya sa indibiduwal; ug maoy gibuhat Niya, ug mao sa gihapon ang pagabuhaton Niya. Ug nagsaad Siya, bisan diha sa Malaquias 4, nga buhaton Niya kini. Husto kana. Busa dinha ang Iyang saad, kung unsa Siya; nagasaad nga kung unsay Iyang giingon Iyang pagabuhaton, ug ania kita karon. Pagkabulahan nga mga tawo, angay lang, nga magmalipayon kita; ginahatagan sila ug ilhanan, pinaagi sa Iyang ilhanan nga gisaad nga Pulong, gisaad nga Pulong. Nagsaad Siya nga buhaton Niya kini. Ug usa. . . “Pabalikon ang Pagtoo sa mga tawo, ang kasingkasing sa mga tawo, pabalik ngadto sa Pagtoo sa orihinal nga mga amahang pentecostes.” Nagsaad Siyang buhaton kini, nga ginapakita ang Iyang mga ilhanan.

²⁵⁶ “Ug maingon sa nahitabo kaniadto sa mga adlaw sa Sodoma, maingon man usab kini sa Pag-abot sa Anak sa tawo.” Unsa man nga matang sa ilhanan ang nakita niadto sa mga kaiglesiahan didto sa Sodoma? Unsa man ang nakita niadto sa intelektuwal nga iglesia? Duha ka magwawali. Unsa man usab ang atua sa espirituhanong Iglesia, nga pinili, sa kang Abraham ug sa iyang pundok? Nakita ang Dios nga napadayag diha sa usa ka lawas nga unod, tawhanong lawas, nga makaila sa espiritu ug nga masulti kung unsa ang giingon niadto ni Sarah sa likod Niya. “Maingon sa nahitabo kaniadto sa mga adlaw ni Lot, maingon usab kini sa Pag-abot sa Anak sa tawo.” Makita na nato ang Balaang Espiritu sa taliwala kanato, nga ginapamuhat ang mao rang butang, nagapamuhat diha sa tawhanong lawas. Kini na ang maong takna. Kita n’yo? Ania na gyud kita, mga higala. Kana lang. Nagapadayon na ang exodo.

²⁵⁷ Apan karon himatikdi, gibuhat Niya kini kaniadto pinaagi ba sa unsa? Himatikdi, ug isul-ob ang espirituwal n’yong panghunahuna. Hinaut nga ipadaplin lang sa Balaang Espiritu ang daan na nga kalo sa kawalay-pagpanumbaling karon, ug susihon og maayo. Pag-mohimo man og usa ka desisyon ang Dios aron buhaton ang unsa man, usa ka paagi, dili Niya gayud kini mahimong usabon.

²⁵⁸ Didto sa tanaman sa Eden, sa diha nga gusto Niyang tubuson ang tawo pabalik ngadto sa pagpakig-fellowship, naghimo Siya og usa ka desisyon: kadto mao ang dugo. Gisulayan na nila ang edukasyon, gisulayan na nila ang pagdenominasyon, gisulayan na nila himoon nga pang-nasudnon, ug tanan nang uban pa, ug wala gayud kadto nagpulos. Adunay usa lang ka dapit nga mahimo gayud tagbuon sa Dios ang tawo, kana ang ilalum sa giula na nga dugo, sama niini kaniadto sa Eden. Wala gayud kini nausab. Ang bugtong dapit nga nakigtigayon ang Dios kaniadto, sa mga adlaw ni Job, maoy ilalum sa hinalad nga carnero. Ang bugtong dapit nga nakigtigayon Siya kaniadto sa mga adlaw sa

Israel, ilalum sa hinalad nga carnero; sama sa Iyang gibuhat kaniadto sa tanaman sa Eden, ilalum sa hinalad nga carnero.

²⁵⁹ Ang bugtong dapit nga nagapakigtagbo Siya sa karon, maoy dili diha sa mga denominasyon; nagasige sila lalis ug lantugi sa usa'g usa. Dili diha sa mga iglesianismo; mao gihapon ang ilang ginapamuhat. Dili diha sa mga intelektuwal; nalibog na sila og ayo. Kondili ilalum diha sa Dugo sa Cordero, makapakigtagbo ang matag magtotoo nga may pagfellowship, kon diin anaa ang Kinabuhi.

²⁶⁰ Nagpili ang Dios, niadtong mga adlaw sa maong exodo, nagtawag Siya og usa ka pundok pagawas. Ug gikan niana nga pundok, gusto kong himatikdan ninyo ang usa ka butang, nagkaaduna lang Siya og duha nga nakaadto sa yutang saad. Pinaagi ba sa unsa ang gipili Niya niadto aron ipahigawas sila, pulitika ba, organisasyon ba? Nagpili Siya og usa ka propeta, inubanan sa usa ka supernatural nga ilhanan sa Haligi nga Kalayo, aron nga dili masayup ang mga tawo. Kung unsa ang giingon niadto sa propeta mao ang Kamatuoran. Ug nanaug ang Dios, sa usa ka Haligi nga Kalayo, ug gipanghimatud-an ang Iyang Kaugalingon, gipakita ang Iyang Pulong. Husto ba kana? [Nagaingon ang kongregasyon, "Amen."—Ed.] Ingon niana kung giunsa Niya pagdala, sa una Niyang exodo. Ang ikaduha Niyang exodo. . .

²⁶¹ Kanunay nagapamuhat ang Dios diha sa tulo. Hingpit Siya diha sa tulo. Inyo na tanan nahimatikdan ang akong wali, kanunay kini diha sa mga tulo ug mga pito. Uh-huh. Ang *pito* maoy "pagka-kumpleto." Ang mga *tulo* maoy Iyang "kahingpitan." Nahauna, Ikaduha, ug Ikatulong Pagbira. Ug, oh, tanan na, tanan nang butang. Kita n'yo? Pagpamatarung, pagpakabalaan, bautismo sa Espiritu Santo. Amahan, Anak, Espiritu Santo. Tanan na! Kita n'yo? Himatikdi.

²⁶² Unsa man niadto ang Iyang gibuhat, sa maong unang exodo? Nagpadala Siya og usa ka propeta, nga dinihogan sa Haligi nga Kalayo, ug gitawag Niya pagawas ang katawhan. Mao kadto ang nahauna Niyang exodo.

²⁶³ Ug sa dihang miabot niadto ang panahon sa Israel, nagpadala Siya pag-usab, og usa ka Propetang-Dios, nga may Haligi nga Kalayo. Nakita ni Juan Kini nga nagakunsad gikan sa Langit ingon nga usa ka salampati. Ug nagaingon Siya, "Moadto Ako sa Dios ug mobalik Ako sa Dios."

²⁶⁴ Human niadto sa Iyang pagkamatay, paglubong ug pagkabanhaw; si Saul nga taga-Tarsus, diha sa iyang dalan padulong sa Damascus, nakita ang kadtong mao ra sa gihapon nga Haligi nga Kalayo. Ug siya ingon nga usa ka Hebreohanon, natudloan og maayo diha sa Pulong, miingon, "Ginoo, kinsa ba Ikaw?" Nasayod siya nga ang Ginoo kadto, kadtong Haligi nga

Kalayo. Usa man gyud siya ka Hebreohanon. Miingon, “Kinsa ba Ikaw?”

Ug mitubag Siya, “Ako mao si Jesus.”

²⁶⁵ Sa ikaduhang exodo, nagpadala Siya og usa ka Propeta, nga dinihogan, nga mao ang Iyang Anak, ang Propeta nga Dios. Nag-ingon niadto si Moises nga mamahimo Siya nga usa ka Propeta; ug adunay Haligi nga Kalayo, ug namuhat og mga ilhanan ug mga katingalahan. Ug kanang mao rang Propeta miingon, nga, “Ang si kinsa man nga nagatoo Kanako, pagabuhaton niya usab ang mga buhat nga Akong ginabuhat.”

²⁶⁶ Ug gisaad Niya dinhi ang mao ra gihapon diha sa maong exodo sa kaulahiang mga adlaw, ug dili Niya mahimong usabon kini. Ug pinaagi sa siyentipikong kapanghimatuoran, pinaagi sa pagsaksi sa Espiritu, pinaagi sa mga buhat sa Espiritu, makita nato kini sa karon, ang gamhanang Haligi nga Kalayo nga nagapanglihok sa taliwala kanato; ug ang mga ilhanan ug mga katingalahan sa pagkabanhaw ni Jesus Cristo, nga ginatawag ang mga tawo gikan sa denominasyonalismo, paingon ngadto sa Presensiya ni Jesus Cristo, aron magkinabuhi, paingon ngadto sa usa ka Yuta. Wala’y pagkasayup, mga higala. Dili tungod nga ginasulti ko kini; igsoon lamang ninyo ako. Apan, tungod nga ginapamatud-an kini sa Dios diha kaninyo, nga mao ang nagapahimo niini nga Kamatuoran. Ang mao ra gihapon nga Haligi nga Kalayo nga Iyang gigamit niadto sa laing duha, Iya Kining gihatud sa inyong taliwala karon, ug nga gipamatud-an Kini pinaagi sa siyensya. Ingon sa inyo nang nahibaloan, gimantala Kini sa *Life* nga magasin sa miaging bulan, didto. Kon diin . . .

²⁶⁷ Pila ba ang ania dinhi ug nga nakadungog kanako nga nagaestorya bahin niana, sa kung unsay nahitabo, sa wala pa kini gimantala niini? Siguro, halos ang tanan sa iglesia.

²⁶⁸ Mao na kini. Wala sila nahibalo kung bahin ba gayud sa unsa kining tanan; gipaningkamotan nga hibaloon sa mga siyentipiko. Ang si kinsa man nga nagkaaduna Niining litrato, ningtawag, “Usa ka Panganud, nga baynte-sais ka milya ang kahabogon, diha sa porma sa usa ka piramide.” Pito ka mga manolunda ang ginarepresentar dinha, nga gibalik ug gihatud kaninyo ang Pulong sa Dios, ilalum sa pagdihog. Ginasulti Niini kaninyo ang kining panahon nga inyong maabtan ug nga gikinabuhian sa karon. Masabtan kana karon mismo sa espirituhanong panghunahuna, kita n’yo, ug makuha kini. Usa Kini ka pag-exodo. Magabiya na kita, usa sa niining mga adlaw. Salamat sa Dios. Timan-i.

Ug taposon ko na, sa pipila na lang ka minuto. Aduna pa ko’y napulo ka minuto.

²⁶⁹ Himatikdi ang maong Haligi nga Kalayo nga nagtawag kanila pagawas niadto, nga nagtultol kanila paingon sa yutang

gisaad, ilalum sa pagdihog sa usa ka propeta. Usa ka Haligi nga Kalayo nga malantaw nila, ang naggiya kanila ngadto sa yutang saad, ilalum sa dinihogan nga propeta. Ug kanunay nila siyang ginasalikway. Husto ba? [Nagaingon ang kongregasyon, "Amen."—Ed.] Mao gyud.

²⁷⁰ Karon, nasayod ako nga gikinahanglan pa natong magkaaduna og panerbisyo sa bautismo. Aduna pa ko'y unom ka mga panid dinhi, siguro. Apan moundang na ako karon, sa pipila na lang ka minuto.

²⁷¹ Bantayi kini. Ania na kita sa usa ka pagtawag-pagawas. "Gumula kamo gikan sa Babilonia, mga tawo Ko,' ang ingon sa tingog sa manolunda." Pagawas sa unsa? Sa kalibog. Husto ba ang Methodist, o ang Baptist, o ang Katoliko ba? "Gumula kamo gikan niini." Dios ang husto. Unsaon mo man pagkahibalo? "Mahimong bakak ang pulong sa tanang tawo, ug ang Akoa Kamatuoran. Panggula kamo gikan niini." Unsa ma'y nahibaloan mo? Ang mao rang Haligi nga Kalayo, ang mao rang Espiritu nga nagadihog, ang nagagiya ngadto sa Yutang saad.

²⁷² Himatikdi, ang maong nagpanguna kanila, ang nagpahigawas kanila, ang maoy naggiya kanila ngadto sa yutang saad; sa Israel, ang nasud.

²⁷³ Ug ang mao rang Dios, ang mao sa gihapong Haligi nga Kalayo! Kana lamang. . . "Ingon nila nga ang. . . nga kadto nga kamera. . ." Kung pagabasahon mo ang kang George J. Lacy; dili ako, ha. Basahon ninyo kon diin nga gisusi ni George J. Lacy kadto nga litrato. Ang maong pangulo sa F.B.I., alang sa mga fingerprint ug mga dokumento, atua didto ang iyang pamahayag. "May nagaingon, 'Nadoble man pag-expose sa lente.'" Tignapulo ka libo sa mga tawo ang nakakita na Niini, sa ila mismong mga mata. Mitindog kami dinhi ug natan-aw na Kini. Natan-aw na ninyo Kini. [Nagaingon ang kongregasyon, "Amen."—Ed.] Dili Kini ingon niana. "Miingon man sila, 'Usa man Kadto ka optical illusion.'" Unsa ba'y ginaingon ni Mr. Lacy? "Ang mekanikal nga mata niining kameraha dili mokudak og sikolohiya." Uh-huh. Dili kadto optical illusion. Mao gyud Kini didto, ang mao ra nga Haliging Kalayo.

Dayon moingon sila, "Oh, bueno, illusion lang kadto."

Karon, adunay mga kamera, sa tibuok, sa ginatus ka milya ka kasangkaron niadto sa Tucson!

²⁷⁴ Unom ka bulan sa wala pa kadto nahitabo, nag-ingon na kami kaninyo, pinaagi sa Balaang Espiritu, nga moadto ako didto aron kuhaon ang maong balita. Tungod kay, ang Nahisulat nga atua didto sa piramide, nga ingon sa gidamgo gayud sa igsoon, ug ako na kadtong gihubad kaninyo. Mao na kana ang kinatibuk-an nga interpretasyon. Karon, ang tanang mga tinago bahin sa pagpamatarung, pagpakabalaan, bautismo sa Espiritu Santo, human nang naisaysay. Ginasaysay na lang nato karon

ang mga ginagmay'ng mga nahibilin nga wala pa naisaysay, nga nahitago dinha sa maong Pito ka mga Selyo, dili nga sa pito ka mga kaiglesiahan. Ang Pito ka mga Selyo ang maong nagapadayag sa mga tinago. Ug dayon Iyang giablihan kini nga butang, didto sa itaas, ug nakakaplag og usa ka Bato didto, nga puti, pero wala pa gayud nasulatan. Usa kadto ka misterio.

²⁷⁵ Miadto ako sa Tucson; gisulti kini daan sa wala pa kini nahitabo. Atua ko niadtong amihanan sa Tucson, may mga saksi niini nga ania karon dinhi, sa dihang miabot ang usa ka pagbuto, nga nagpatay-og sa mga kabukiran gikan sa yuta, halos. Ug sa mao rang higayona, usa ka lingin nga Kahayag ang nagalutawlutaw didto sa kawanangan, sa diha karon nga gikuhaan kadto og litrato sa siyensya. “Baynte-sais ka milya ang kahabogon,” mga lima ka pilo pa gyud ang kalayoon gikan sa gabon o unsa man nga mahimong magkaadunay ingon niini. Ug dili man lang nila mahibaloan kung unsa ang nagpahimong hinungdan niadto.

²⁷⁶ “Motungha ang Kahayag sa panahon sa kagabhion.” Ang dalanon paingon sa Kahimayaan sigurado gayud makaplagan mo, kung pinili ka. Ang kanang Binhi nga nagakahulog sa mga nag-uga na nga yuta, sa mga bato, wala gayu'y mahitabo niini og bisan unsa man; sa magahi'g, batohon nga mga kasingkasing nga walay-pagtagad. Apan kung mahulog Kini diha sa mahumok, malumo nga yuta sa pagtoo, mamunga Kini og usa ka Cristohanon, nga nagapamunga sa mga bunga sa Espiritu.

²⁷⁷ Himatikdi kung unsa nga gibuhat kadto sa Dios. Anaa Kaniya karon ang mao ra gihapon nga Haliging Kalayo. Nga mao ang nagpanghimatuud.

Adunay miingon, “Nganong dili mo man sultihan silang mga siyentista bahin niana?”

²⁷⁸ Nagahunahuna ba mo nga motoo sila Niini? “Ayaw isalibay ang inyong mga mutya sa mga baboy.” Nag-ingon si Jesus nga ayaw. Walay pag-agak kanako nga buhaton kini, bisan pa man nga nagpuyo ako didto sa siyudad kon diin ginahangyo nila kini. Nahunahunaan kong moadto didto. Miingon ang Balaang Espiritu, “Pahalayo kanila. Dili kini para sa ila. Balik ka ug sultih ang tabernakulo.” Bueno.

²⁷⁹ “Ug magakahitabo kini. Kung nagakahitabo gani ang ilang ginasulti, nan, timan-i, Ako'y nagsulti,” ang ingon sa Ginoo, “kita n'yo, sa dili pa kini nagakahitabo.” Nahitabo gyud didto. Patalinghugi ang Biblia, ang Tingog sa Dios nga nagapanawag kaninyo sa niining adlaw.

²⁸⁰ Karon gusto kong himatikdan ninyo. Kining mao ra nga Haliging Kalayo ang nagaagak pag-usab sa mga tawo ngadto sa Yutang saad, ang Milenyum. Kon diin, nga nahibaloan nato, ilalum sa inspirasyon niining Ikaunom nga Selyo, (wala pa gayud

kini natudlo sa una), kung unsa nga gikinahanglan malimpyohan ang kalibutan alang sa Milenyum. Ginaagak na sila sa Haliging Kalayo ngadto sa usa ka Milenyum.

²⁸¹ Ug mahimatikdan ninyo ang maong Haliging Kalayo nga nag-agak sa Israel gikan sa pagkaulipon, sa niadtong maong exodo; ang Haligi nga Kalayo, ilalum sa kapangulohan sa Dios. Dios kadto ang mao nga Kalayo, ug gidihogan lang sa maong Haligi nga Kalayo ang propeta. Ang Haliging Kalayo maoy motindog ingon nga usa ka Langitnong saksi nga si Moises gitawag na pagawas.

²⁸² Hinumdumi si Dathan, sila, nga nanag-ingon, “Bueno, angay na namong sugdan ang usa ka organisasyon. Moises, sobra na ang pagpadaku mo sa imong kaugalingon. Ginapaninguhaan mong ingnon nga ikaw lang ang usa nga balaan kanatong tanan. Balaan man ang tibuok kongregasyon sa Ginoo. Unsaon mo man pag-angkon niini nga sa imo lang kaugalingon?”

²⁸³ Ug mihapa si Moises ug misugod paghilak. Miingon ang Dios, “Ipahalayo mo ang imong kaugalingon gikan kaniya. Pagabukaon Ko ang yuta ug lamoyon siya.” Ang pagtipo. Unsaon pagkahimong...Giingnan sila ni Moises nga ang ginasulti niya kanila maoy kung unsa ang giingon sa Dios, nga ginapanghimatud-an Kini sa Dios nga mao ang Kamatuoran.

²⁸⁴ Bisan si Miriam, ang propetisa mismo, ug si Aaron, gikataw-an niadto si Moises, tungod sa pagpakigminyo niadtong Etiopiahonong babaye, gihimo siyang kataw-anan. Ug nasuko niadto ang Dios; sa maong pagsulti batok sa Iyang alagad. Unsa man ang Iyang gibuhar? Gipatawag Niya sila ngadto sa pultahan sa tabernakulo. Ug si Miriam, bisan pa, nga usa siya ka propetisa. Apan si Moises labaw pa kay sa usa ka propeta, labaw pa sa usa ka propeta. Nag-ingon Siya, “Wala ba kamo nahadlok sa Dios? Kung adunay usa ka propeta sa inyong taliwala, Ako nga Ginoo magapakigsulti kaniya diha sa mga panan-awon, ug ipaila kaniya ang Akong Kaugalingon diha sa mga damgo, apan,” miingon, “dili sama niana si Moises.” Miingon, “Wala ba kamo nahadlok sa Dios?” Ug siya—halos mamatay na siya niadto tungod sa sanla, niadto mismong higayona. Nahibalo na kamo niana.

²⁸⁵ Dili ba nga giingon Niya, “Si Juan nga Bautista. Miadto ba kamo aron makita ang usa ka propeta? Oo, labaw pa sa usa ka propeta”? Ngano man? Ngano man nga mas labaw pa siya sa usa ka propeta? Siya niadto mao ang mensahero sa Pakigsaad, ang arka nga nagdugtong niadtong duha ka mga dispensasyon.

²⁸⁶ Ug karon, ang...ang ania sa taliwala nato, kining gamhanang Balaang Espiritu, maoy labaw pa kay sa usa ka propeta. Ang Dios kini nga nahipadayag sa atong taliwala, inubanan sa Iyang Pulong aron pamatud-an kini. Nagapamuhar

nga labaw pa kay sa usa ka propeta, sa linibo ka pilo nga labaw pa kay sa mga ginabuhat sa mga propeta.

²⁸⁷ Si Elias, ang usa sa pinakagamhanang mga propeta sa kapanahonan, nakapamuhat og upat lang ka supernatural nga butang, sa tibuok niyang kinabuhi nga kapin kon kulang sa otsenta ka tuig. Ug si Eliseo, nga may duha ka pilo niini, nakapamuhat og walo.

²⁸⁸ Ug makita nato ang maong linibo ka linibo, sa ato mismong mga mata, makita ang Manolunda sa Ginoo, diha sa usa ka Haliging Kalayo. Ang siyentipikong pagsusi, ang nagadala niini ngadto sa kalibutan, sa paghibalo nga pagahukman sila pinaagi Niini. Unsa ma'y gibuhat sa Cordero, niadtong Manolunda sa Ginoo, nga mao si Cristo? Nagatoo ba mo niini? [Nagaingon ang kongregasyon, "Amen."—Ed.]

²⁸⁹ San Juan 6. Nagapanginom silang tanan niini nga tubig, ug nagkasadya niadtong ug nagkalipay. Miingon Siya, "Ako mao ang Tinapay sa Kinabuhi nga nagagikan sa Dios sa Langit. Ako ang kadtong Bato nga atua niadtong sa kamingawan."

²⁹⁰ Ang ingon nila, "Karon nahibalo kami nga Ikaw buangbuang. Ikaw—buangbuang Ka. Ikaw, aduna Ka'y Yawa diha Kanimu. Usa Ka ka Tawong buangbuang, nga may yawa." Kahibalo mo, mahimo nga ang mga tawo mapuy-an og usa ka espiritu, nga usahay nagakamaabtikon, nagakarelihiyoso kaayo. Ingon nila, "Ikaw—Usa Ka ka Yawa. Aduna Ka'y Yawa diha Kanimu. Usa Ka ka Samaritanhon, ug aduna Ka'y Yawa diha Kanimu." Ingon pa, "Ug ania pa, wala Ka pa ngani kaliman ka tuig, ug moingon Kang nakita Mo na si Abraham?"

²⁹¹ Makita ko Siya nga nagaatras og pipila ka lakang. Miingon, "AKO MAN ANG MAO AKO. Wala pa si Abraham, MAO NA AKO." Kadto mao ang usa ka nagasiga nga Kalayo, ang kadtong Haligi nga Kalayo nga atua sa sapinit.

²⁹² Sa pagkamatay Niya, ug nabanhaw sa ikatulo nga adlaw, ug natagbo Siya ni Saul didto sa dalan, mibalik na Siya sa niadtong Haligi nga Kalayo. Miingon, "Nagagikan Ako sa Dios, ug mobalik Ako sa Dios."

²⁹³ Sa dihang nabilanggo si Pedro, misulod kadto nga Haliging Kalayo, giablihan ang mga pultahan ug gipahigawas siya. Husto.

Asa man sila niadtong gidala sa maong Haligi nga Kalayo?

²⁹⁴ Karon, hinumdumi, dili si Moises niadtong ang Haligi nga Kalayo. Siya ang dinihogang lider, ilalum niadtong Haligi nga Kalayo, ug gipanghimatud-an lang sa Haligi nga Kalayo ang iyang Mensahe pinaagi og mga ilhanan ug mga katingalahan.

²⁹⁵ Ug giagak sila niadtong Haligi nga Kalayo paingon sa yuta nga gisaad sa Dios kanila, kon diin nga Siya, Mismo, mamahimong unod sa ilang taliwala, sa umaabot nga adlaw.

Husto ba kana? [Nagaingon ang kongregasyon, “Amen.”—Ed.] Unsa na usab ang ilang gipangbuhat? Nanagsige bagulbol, og nanagmug-ot, ug tanan nang uban pa, nga nagapakita lang nga ilalum kadto sa dugo sa ordinaryong carnero.

²⁹⁶ Apan sa niining panahon (himaya sa Dios), ang Haligi nga makita nato diha sa atong taliwala, ang maong Haligi nga Kalayo magapanguna kanato ngadto sa Milenyum, kon diin pagabalikan Niya ang Iyang katawhan sa nianang halangdong paghari pag-Milenyum na human sa niining exodo, kon diin magakinabuhi na kita uban Kaniya sa Walay-Katapusan. Anaa Kaniya sa kanunay ang Pulong sa Amahan, nga kanunay’ng nagapamatuud nga husto Kini.

²⁹⁷ Ania kita sa usa ka exodo. Ug sa akong pagbiya, ug sa pagpalong na dayon sa maong mga teyp. Oh, mga higala ko, mga igsoon ko, ang parehong mga ania karon ug ang mga maminaw niining mga teyp, tugoti kong . . . ingon nga inyong igsoon ug kalungsuranon sa Gingharian sa Dios. Panggula kamo, og kuyog sa niining exodo, kay ang tanan nga mahibilin pagamarkahan sa marka sa mapintas nga mananap. Panggula kamo gikan niini nga Babilonia. Panggula kamo gikan niini nga mga pagkalibog. Panggula kamo gikan niini nga mga sistema, ug alagari ang Dios nga buhi. Ipahanugoting . . .

²⁹⁸ Kini mao ang gamhanan nga Manolunda sa maong Pakigsaad! “Si Jesus Cristo, sa nagalungtad diha sa kinaiya sa Dios, wala mag-isip sa iyang pagkasama sa Dios, ingon nga usa ka butang nga pagailogan.” Karon usa Siya ka Haligi nga Kalayo, diha sa mao rang porma kung unsa Siya kaniadto, sa pagpahigayon niadtong nahaunang exodo, sa pagpahigayon niadtong ikaduhang exodo, ug ania na Siya karon sa niining ikatulong exodo.

²⁹⁹ Sa niadtong nahaunang exodo, unsa ma’y Iyang gibuhath? Gipahigawas Niya sila gikan sa usa ka natural nga kayutaan, paingon sa usa na usab ka natural nga kayutaan.

³⁰⁰ Sa ikaduhang exodo, gipahigawas Niya sila niadto gikan sa usa ka espirituwal nga kahimtang, paingon ngadto sa usa ka espirituwal nga bautismo sa Espiritu Santo.

³⁰¹ Karon Iya na silang ginadala gikan sa maong espirituwal nga bautismo sa Espiritu Santo, paingon mismo ngadto sa Yuta nga Walay-Katapusan sa Milenyum ug sa dakung Laing Kinabuhi. Ang mao rang Haligi nga Kalayo, sa mao ra nga dinihogang pamaagi, ang mao rang Dios nga nagapamuhath sa mao rang mga butanga! Ug ang mao rang Pulong, nga nagdeklara sa nahauna, ang nagdeklara sa maong ikaduha. Ang mao rang Pulong, nga nagdeklara sa ikaduha, ang maong nagdeklara sa ikatulo, ug ania na Kini nga makita nato sa atong taliwala.

³⁰² Panggula kamo. Oh! Panggula kamo niini nga kagubot, Pangduol kamo ngadto sa buhi nga Dios. Pangduol sa Pulong.

“Ug ang Pulong nahimong unod ug nagpuyo ipon kanato.” Ug karon ania na Siya sa atong mga unod, nga nagapuyo kauban nato. Panggula kamo ug alagara ang buhing Dios.

³⁰³ Samtang nga atong ginaduko ang atong mga ulo. [Usa ka igsoong lalaki ang nagasulti diha sa laing mga dila. Usa usab ka igsoong lalaki ang nagahatag sa maong interpretasyon—Ed.]

³⁰⁴ Samtang nga nakaduko ang inyong mga ulo. Gikan sa kinasuloran sa inyong kalag, gikan sa pinaka-kinasuloran ninyo, buot n’yo bang hinumduman nga . . . Andam ba kamong undangon na ang tanan nga pagkakalibutanon, ug nga magkinabuhi na alang sa Dios? Karon, kung dili kamo matinud-anon niini, ayaw buhata kini. Apan kung kinasing-kasing ang sa inyoha niini, sa tibuok ninyong kasingkasing, nga kamo konbinsido na gyud karon. Sama sa giingon niadto ni Jesus, diha sa pagtapos na sa Iyang ministerio, “Karon nagatoo ba kamo?” Konbinsido ba kamo nga husto gyud kining mga butanga, nga gipanghimatud-an gayud sa Dios, ug nga ania na kita sa kaulahiang panahon, ug tinuod gayud nga gusto ninyong modoul kang Cristo karon? Pag-uban na sa niini nga exodo, nga mao ang pagtawag pagawas gikan sa pagkawalay-pagtagad, gikan sa denominasyonalismo, sa mga panghunahuna ug mga butang nga iya sa kalibutan. Ug gusto ninyong mosurender sa kinasing-kasing gayud ngadto Kaniya ug nga mogawas na nga nagauban niana nga exodo, paingon sa maong mahimayaon nga Yutang saad, mahimo bang ipataas ninyo ang inyong mga kamot samtang nagaampo kita? Sigurado ba gyud mo nga buot ninyo nga moduol, ang matag-usa?

³⁰⁵ Langitnong Amahan, sa kadtong mga nakataas ang ilang mga kamot, ipahigawas Mo na sila karon, Ginoo. Tugoti ang Balaang Espiritu, sumala sa saad sa Pulong, tugoti nga manglihok ang Balaang Espiritu diha sa ilang mga kasingkasing. Gikan sa among kongregasyon, adunay mga baynte ka kamot, nga nagatoo ako, Amahan, nga natagbaw gayud ug nakahibalo nga kini—nga husto kini, ug nga gusto na nilang mangduol. Kung aduna man nianang . . .

³⁰⁶ Sa mga adlaw niadtong paggawas sa Israel, gikan sa duha ug tunga sa milyon ka mga tawo, duha lang niadto ang nakasulod sa maong yuta.

³⁰⁷ Sa mga adlaw ni Jesus Cristo, adunay mga usa ka gatus ug baynte niadto ang nakasulod.

³⁰⁸ Ug karon, sa mga adlaw sa paghinapos na sa kalibutan, nag-ingon Ka, “Masigpit ang pultahan, ug hiktin ang dalan, ug pero diyutay ra ang nakatultol niini. Apan halapad ang dalan nga nagahatud ngadto sa pagkalaglag, ug daghan ang nagasulod agi niini.” Dili gayud mapakyas kini nga mga Pulong. Imoha kini.

³⁰⁹ Karon nagaampo ako alang kanila, Ginoo. Nagaampo ako, niining taknaa, nga pinaagi sa Imong Balaang Espiritu,

circuncidaha kini nga mga kasingkasing. Tangtanga ang tanang maka-kalibutanon nga mga butang. Circuncidaha ang ilang mga igdulongog, aron nga klaro nga madungog nila ang Tingog sa Dios, nga nagapanawag, pinaagi sa Iyang Pulong ug pinaagi sa Kahayag sa maong adlaw. Ug itugot, Ginoo, nga maablihan ang ilang mga mata, aron nga makita nila ang kahimayaan sa Dios sa niining nagahinapos na nga panahon. Nag-ingon Ka, “Magaduol ang tanan nga gihatag na sa Amahan Kanako, ug pagabanhawon Ko sila sa kaulahiing adlaw.”

³¹⁰ Ginoo, adunay daghan pa dinhi tingali nga wala pa sa gihapon nakasabot. Nagaampo ako nga Magasulti Ka kanila, ug nga pagahatagan sila og usa pa ka kahigayonan, Ginoo, aron nga mahimo na nilang masabtan, ang madungog Kang nagapakigsulti pinaagi sa Imong Pulong, nga nagapamatuud sa Imong Kaugalingon; ug dayon nga nagapakigsulti Ka kanamo diha sa supernatural nga tingog, ug nga sundan sa usa ka interpretasyon; aron nga makita ang gamhanan Mong mga buhat nga ginapanghimatud-an Kini, nga nagasubay sa Biblia. Nagaampo ako, Dios, nga pasayloon Mo kami sa among mga kasal-anan, karon, ug samtang nga nakahapa ako diha niining Pulong.

³¹¹ Dios, nahunahunaan ko nga, usa pa lang ka semana ang milabay, ako—gihapaan ko niadto ang usa ka patay na nga lalaki dinhi sa salog. Nakita ko nga gibuhi Siya pag-usab sa gamhanan nga Balaang Espiritu. Ang mga mata niya niadto nga naglurat na, nagbuy-od, nga patay na. Sa hamubo, og pipila lang ka mga pulong sa pagpanawag sa Imong Ngalan, nakita ko siyang nabuhi. Ania siya karon, nga buhi, bisan pa man. Ginoo, Ikaw ang mao ra nga Dios, nga, sa gihapaan ni Pablo kadtong batan-ong lalaki, nga sa pagpaminaw kaniya sa hataas niya kaayo nga wali, nahulog kadto nga lalaki gikan sa bintana. Ikaw ang mao ra nga Dios nga makapahibalik sa kinabuhi. Ginapasalamatan Ka namo, Amahan. Tingali ang . . . Ang dili-magtotoo tingali dili motoo. Apan kami nagatoo, Ginoo. Imo nang gipamatud-an ang Imong Kaugalingon nganhi kanamo.

³¹² Karon tugoti nga ang mga pagpamalandong sa akong kasingkasing, ug ang mga panghunahuna sa akong salabutan, ang akong kusog ug tanan na, mangatunaw ngadto niining Pulong. Ug itugot nga ang Pulong ug ako, nga dungan, Ginoo, uban niining mga tawo, magamartsa padulong sa Gingharian sa Dios. Itugot kini, Ginoo. Pasayloa ang among mga kasal-anan. Ayoha ang among mga sakit, ug himoa kaming mga alagad sa Imong Gingharian.

³¹³ Ug karon, samtang nga nagapangduol ang mga niini, Ginoo, ug nga ginaablihan na ang bautismohan, nga andam na ang tubig, ug nga pipila na lang ka minuto sugdan ang pagpangbautismo, mahinumduman namo nga sa giwali kining

mao ra nga Maayong Balita kaniadto, nag-ingon ang Biblia, “Ang tanan nga nanagpanoo gibautismohan.”

³¹⁴ Ania ang mga panyo nga nakapahimutang dinhi, Ginoo, nga akong ginapanalanginan sa Ngalan ni Jesus Cristo, alang sa pag-ayo sa mga masakiton. Dayon sa diha nga . . .

³¹⁵ Nagkahataas ang among mga pagpanerbisyo, nagkadugay, tungod kay nagka-ulahi na ang takna. Gikinahanglan nga mahipugas na ang Pulong samtang nga aduna pa’y yuta nga mapugasan Niini, tungod kay ang matugnaw nga tingtugnaw haduol na. Makita na namo kini. Nagakahulog na ang mga dahon, ug nasayod kami nga haduol na gyud ang tingtugnaw. Gikinahanglan nga kuykuyon na namo ang ibabaw sa yuta ug nga mailubong ang maong Binhi. Busa, nagaampo ako, Langitnong Amahan, nga magapakigsulti Ka sa matag kasingkasing.

³¹⁶ Ug nag-ingon ang Biblia, “Ang tanan nga nanagpanoo gibautismohan.” Ug, Ginoo, kung aduna karon og daghan dinhi nga nanagtoo, ug nga wala pa gayud nabautismohan sa Ngalan sa Imong Pinalangga nga Anak, nga si Jesus, hinaut nga mangduol sila karong buntaga, nga malumo ug mapainubsanon, ug nga ginasugid ang ilang sala, ug nagakamatay na sa mga butang nga iyaha sa kalibutan; aron igalubong na, aron nga dalhon na ang Ngalan ni Jesus Cristo; aron magkinabuhi na nga diosnon, sugod karon, pinaagi sa tabang sa Balaang Espiritu. Amo silang ginatugyan Kanimong karon, Ginoo, alang niining katuyoan, sa Ngalan ni Jesus Cristo. Amen.

³¹⁷ Karon ato nang ginatugyan ang panerbisyo ngadto kang Igsoong Neville, ug alang sa kung unsa pa man nga iyang igasulti, samtang nga nagapangandam kita sa panerbisyo sa bautismo.

³¹⁸ Ug unyang gabii, sa alas siete y medya, kon itugot sa Ginoo, gusto kong iteyp kining usa pa ka Mensahe. Panalanginan kamo sa Dios hangtud na sab unya.



ANG IKATULONG EXODO CEB63-0630M
(The Third Exodus)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Hunyo 30, 1963, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2014 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org